

南陵縣志卷四十二

藝文志

賦

靈巖賦

明方新池
參政州

騷人攀龍而直上摩伏虎而時登逍遙乎其盤踞
乎其肩有藪在豆有酒盈尊對無影之趣放有骸之形
撫大塊之樂論知己之心奇芳馥鬱瑞氣氤氲舞霓裳
而曳綵袖擁兩腋而拂單襟明光閭闔不足以擬其爽
垠閨苑蓬瀛不足以究其虛盈披天門而騰騰倒銀海
而嶙峋始飄飄以共適復停盃而虛警如茲巖之峻觀
南陵縣志 卷四十二 藝文 二

文瀾亭賦

清何一化
邑人

城北里許二水合處有橋穹然是曰龍會固爲
民利涉乎日用形家言爲人文計爾邑乘所云
玉龍鎮秀者也上冠以亭高華聳秀更益神彩
明沈徐二公之遺烈懋哉修葺無人頽於歲久
前令某曾叱鄉氓新之矣費二百餘金工釋器

而圯蓋徒爲蠹胥飽也積歲以來橋愈下陷亭
未墜地者十之一往來者徒環視太息莫或任
其事岌岌不日暮支已今西蜀屈侯顧而歎曰
斯事既弗可緩日又不暇給奈何雖然吾以委
諸其人爰偕僚佐暨士若民各捐資若干約三
十金零屬余董厥事伐材鳩工經營首夏閱月
而竣巍乎煥乎增美舊觀於其落成顏之曰文
瀾亭余援筆賦之

聘余目於名區嘗富登臨以標勝匪徒觀美之是矜實
占風氣之隆盛望雲物而察民俗固極遠夫虛明節勞
逸而淪精神尤振奇乎崇峻吾邑素饒於山水締造特
飭夫亭臺有橋駕波於龍會行空扼要於潏洞蔚然虛
亭之上冠翥飛棟以崔嵬一邑咸納於窗牖輝輝圖
畫之天開猗歟昔賢之剏物遺烈觸目而徘徊感奇觀
之就圯齧洪濤而欲摧憶神物之待人煥久湮於重照
來卓魯之名臣恢復圖而展眺方戎馬之繹騷爰模芻
之撥調揮才力之優餘分暇晷而計效忽蜃樓之架空
儼霞標而星耀甯規巧於人工疑飛來於天造橋鞏固
而安瀾亭壯麗而矗昊出塵外以崢嶸馮縹緲而窮汗
灝逐風景以閒登神飛揚而虛蹈矚夫兩水之南來競

蜿蜒以齊驅夾石魚之孤嶼映萬木而縈紆波搖郭以綠泛光徹天而青鋪合潭淮之澎湃走膝下以委軀立鷺鷥而飛翡翠浮鳬鷗而沒鷓鴣潛深林之黃鸝似應波聲而相呼魴鯉縱蠶而浪激鱸鮪紆鱗而潭居紛水族之百種羣戲泳於孤蒲洵澤國之富美俯楫欄而舒徐少焉鱗紋之散紅望西山之霞起列峯嶺之翠嶺如張屏障於席几指工山之龍池時降靈雨於一洗昔棲真人以鍊丹欲分烟雲於一七射的何占而白馬人何靈而紫各魁壘以炫秀嵐沾袖於尺咫東招侶於珎瑯出林端以遙比鮮纖悉之遁形藐層崖之在底窗櫺翠

碧其紛紛心神凝而如水何怪青蓮秋浦之遊覽垂名乎謝家之池縱酒吟詩如昨日舊山新水識容輝空眺安賢之寺松風颯颯其來吹魂騎赤鯉以偕遊應驚此際之瑰奇輕軒冕於泉石感今昔而長思浩飄飄而遺世結浮雲而相追聊逍遙而遐憇亦奚是而奚非爰下睨夫魚舟方欸乃而答響翳楓林而參差點烟波於蒼莽或乘漲以舉罾或遡洄而拍漿驚水鳥於汀沙掠激濺而下上有垂釣於苔磯固水性之消長涉耕夫而荷鋤情依依而款講遙擲錢以問驢燦如銀之色晃玩風景之悠然堪披襟而獨賞若乃人物之輻輳允徒輿之

津梁紛負載之交錯雜職業於農桑或仕宦之稅駕殫經營於四方盼波光而止息分憂樂而異行馳憧憧其何極散轍迹於夕陽羨流水之靜遠憫羣類之奔忙至於舟航之轉輸又百貨之交集張席帆之如雲環蓼洲之汨入帶日影之殘紅搖飛簷之彩色排鹽舶與米艘通江湖於異域萃危檣之鳴鴉泊人烟之如織問隄柳之酒帘聒鄉音之唧唧納美利於長河鎖烟瀾而屹立既欣景物之特異尤感時序之靡同即茲端午之懸虎乃觀弄潮於躍龍競渡勇齊於電掣採蓮歌徹於雅風蘭麝飄而朱簾映簫鼓動而畫鷁衝棹勢奮怒而崩岸

旗影容與而颺空立綺疏如天上流三面之冲融倏澄泓而蕭瑟餘白蘋之鬱葱尋熇炎之相逼美納涼於虛中交四際之沉綠貫衆木之長風看片雲之過水數密雨之來峯敲碁聲於百尺沸茶鐺之如松橫方紋之清簟枕古剎之疏鐘尤美麗之難忘歷秋冬之令節楓染丹而山蒼渚拖藍而潦潔天界擴而地勢高疏木吟而驚風射綿曠野於孤烟印百川而一月鑑鬚眉於空明吸素輝而濯魄紫瀾推而仙槎泛素雲飄而羽衣白攬太清之浮浮擲人寰之鎖屑曾日月之無幾逢密雪之驟飄擠瓊枝之璀璨列玉屏之岩巖步丹梯以赤足傾

竹葉之酒瓢凝天地於一色聳介立之孤標捲帷幕而目眩搜麗句而呵毫悄萬籟之俱寂惟壩水之怒號摸紫鰭於石罅泚葦笠於輕舸欣溪梅之含凍憶先春之柳條行芳津之拾翠集兩岸之遊遨攬四時之清淑收一亭之孤高紀春穀之封疆侈風土之綺麗川五里而六橋如鏡遊而虹霽煥寺觀之輝煌鬱樓臺之蒸蔚惟茲亭之獨雄擷城野之蒼翠俯百雉而遙鶩抗浮圖而平視昔用形家之說氣聚兩水之漬橋爲玉龍之鎖秀亭爲金鳳之鳴文高明接乎北斗華麗燭乎卿雲遡詞源於河漢涌萬斛之鱗紋況眉山煥籍峯之彩錦江注

浣水之芬玉堂金馬輝映棟宇天潢滄海沛若涯津爰揮毫以紀勝允宜文瀾以名亭

籍山橋賦

何一化

繁陵陽之雉堞扼形勝而樹基環以翠嶂繞以縹碧之澄溪氣旁礴而更聚麗闐闐以加奇聳籍山之如髻而帶市河之如絲毓萬家之生聚界金湯以爲東西藉虹霓之天落通車馬於中達斯雄橋之擅勝鬱婉蜿蜒於水湄兼新成於既廢允振奇於茲時境擁衆派之交流自天區畫以錯繪燦然脈理之既明融然聯絡之有待茲橋傲睨以橫亘提攜兩岸以縈會崢嶸並列夫

高閭風氣視古而盛倍名以籍而文物斯煥名以市而聚集斯繁遂荷富教於司牧允號江左之名藩賢者盡心於迺職羣識締造之淵源載酒落成而塵至如躋丹霄而高騫方夫兩泉之既盈牽縈廻之碧瀏集魚網焉參差浮畫鷁焉先後紛夾崖兮人烟照朱粉兮窗牖漾雲霞於波紋出燈光於深柳欣氣象之重新挈闔邑於臂肘東北溯長河與鉅湖西南接疊嶺與崇阜春夏蒼綠楊紅葉於渺茫秋冬綴丹楓紫蓼於左右儼矣圖畫之平鋪煥乎江山之希有風景秀麗熙攘往來摩肩接跡有聲其底擁都會之珍貨列廛肆以曉開接魚鹽之

舳艫崇積貯之崔嵬排茶社之雪乳馥酒樓之金罍鳴啁啾之絲管畱煙霧於水隈至上元與中秋皎迢迢之芳夜擁冰輪於金波燦火樹於朱樹來玉珂之踟躕散紈袂之蘭麝沸人聲之喧填簇欄楯而低亞六花驟飄瓊瑤霏射飾萬屋之清輝凝樓臺於冰罅可策蹇以尋梅抽詩詞而飛翠踞多勝於山城曠千驥以永駕噫嘻友玉帶而並峙傍有橋名玉帶跨龍門而爲鄰北門橋名龍門控天馬之奮鬣小南門名天馬招石魚之遊鱗北關洲名石魚斯百里之上瑞長屹立於芳津當其成迹之就墮莫身任夫碩畫惟賢尹之殫謀竭囊橐而弗惜諏傑構於工師採北山之美

石增盛事於舊觀跨潺湲而突兀羣問津之誰迷晤題
橋之美迹立川梁而文思沛涉康衢而農業釋洵宏利
濟於寰中爰頌賢聲於罔斁

清弋江賦

劉應湛 邑人

蕃釐奠位流峙分形雄稱天塹勝紀蓬瀛屬封疆而地
險觸道路而要津維春穀之百里隸宛水之西濱自邑
治以達郡羌中途所必經橫廣川之清弋界斷岸而波
明輒杭之以一葦每盼睽以怡情時激灑兮日麗乍淪
漣兮風清溯濫觴於黃山沿僊源與秋浦匯花潭與梅
溪大河身於茲所總遙達乎鳩茲爰派別之可數鍾澤

南陵縣志 卷四十二 藝文

七

北而黃池長地西而石碓悉舟楫之能通信往來之所
指商旅驚其星馳物貨紛其雲委顧市廛於高埠眺竹
樹於平沙列喧囂之閭闔繞葱鬱之桑麻來源源以何
窮逝滔滔其靡涯想禹迹之云邁分斗野而匪遐爾乃
撫時光懷古昔覽山川稽載籍雖吳楚之偏隅實宣歙
之險阨方典午兮紛擾首王敦兮作逆繼錢鳳兮跳梁
賴鍾雅兮安宅惟茲焉以固守率將士而戎役暨黃巢
兮倡亂業分濟兮長安肆屠戮兮建德羣驚怖兮江干
樊儔輕敵而潰王涓銳戰而殫幸王凝之碩畫亦茲焉
其屏翰方今民安物阜河清海晏漳水拖藍澄江如練

漁火星聯採樵風便扣舷而歌一唱三歎杜司勳之纏
綿梅都官之繾綣村柳之句猶傳紫騮之篇足羨誰昔
賢而嗣響爲臨流而眷戀若乃天中節候競渡龍舟爭
憑浩淼舊習嬉遊孰若析支分於溝渚普利濟於田疇
穀池千頃灌溉漳陵萬井豐收尤部屋所沾澤洵沃壤
而神洲

工山創翠賦

鄭文熊 涇縣孝廉

何渾敦之剖判夫兩儀兮又詔工倕而築地首封太岳
以爲雲闕兮翻八柱而爲戶牖劇九嶷之嶺嶂兮劉三
峯於岫嶁刻劃衆山刮契羣阜剗剗崔嵬分勢培塿於

南陵縣志 卷四十二 藝文

九

是維絡狼藉岑嶠昂低千巖筍出萬岫鱗批斷者如斲
峴者如剗穴者似鑿銳者似鑿胡共工之觸夫不周兮
迺者地獨缺夫東南皇媧將斷鼇以繼極兮乃憩陵陽
而阻驂奮補天之餘技揮羣工而趨趨羣陰爲斧兮風
雷爲劍史皇抹黛兮清氣爲藍割青玉之一片拋江東
之半簪至今屹立之中峯惟遠望之而翠含言乎其爲
狀也峯嶸歸嶺巖鬱律穹窿矗地峯起倚天勢雄既崢嶸
而險巖復嶺嶺以鬱葱儼屏風之疊疊紛列去乎連雲
恍紫蓋之重重競撐出以凌空脈散崩施如布鏤石之
屑文成罅裂似餘斤斧之蹤邈邈高褰若醉仙乘鶴扶

青霄而直上亭亭峻峙如金莖承露擎孤掌以臨風其
爲色也似黑黥黥如元罨栳雲光豔起於封中秀色爛
發於風穴青點警而成團碧障天而一色樹爲衣兮草
爲裳烟爲帷兮雲爲帕近矚兮似青城之霄麗遠眺兮
何光鋌之外徹爾其雲移峯瘦嵐回霧鎖朝霞舉而照
耀晚靄淨而帖安春兮綺媚濃佛頭之一滴秋至澄娟
沐蓮花之半朶排萬戶而送青畫江城之一幅落危影
於千尺寒數村之烟火爾其松冠嶺而幹直楓排阜而
影圓蘿綠壁以綴色竹叢生而刺天青蘋狎獵綠蕪蔓
延花百色兮麗簇鳥千聲兮音便路嶮袤而磴絕泉細

南陵縣志

卷四十二 藝文

九

出而高懸莫不峯環色漲壑轉光旋駢萬族之灼爍煉
一峯之嬋娟若夫襟帶崇墉屏藩邑里噓氣甕生觸石
雲起山見怪物民焉是企神何室兮杳崆峒龍何藏兮
蒼巖黥谷風震蕩而搖其巔靈池湯瀑以潰其底汨兮
河海之潤沛乎甘霖之被吁嗟乎丹穴蒸乎霞映赤壁
焚於火攻石胡瑩而似鏡嵩胡洞而穿江不造輿人名
曰車蓋不鑄軒轅號曰爐峯九疑何似連綿一色飛來
何所終古穹崇信山川之奇麗兮似有神物以相通亘
茲山之削出兮竊恨乎造化之太工

詩

還都道中作

宋鮑 昭

昨夜宿南陵今日入蘆洲客行惜日月崩波不可留侵
星赴早路畢景逐前儔鱗鱗夕雲起獵獵晚風遒騰沙
鬱黃霧翻浪揚白鷗登艫眺淮甸掩泣望荆流絕目盡
平原時見遠雲浮倏悲坐還合俄思甚兼秋未嘗違戶
庭安能千里遊誰令乏古節招此越鄉憂

郡內登望

齊謝 朓

陽太守

借問下車日匪直望舒圓寒城一以眺平楚正蒼然山
積陵陽阻溪流春穀泉威紆距遙甸巉巖帶遠天切切
陰風暮桑柘起寒烟悵望心已極惘怳魂屢遷結髮倦

南陵縣志

卷四十二 藝文

十

爲旅平生早事邊誰規鼎食盛甯要狐白鮮方棄汝南
諾言稅遼東田

送張誼歸

唐王 維

太原右丞

五湖千萬里況復五湖西漁浦南陵郭人家春穀溪欲
歸江淼淼未到草凄凄憶想蘭陵鎮可宜猿更啼

旅行欲泊宣州界

一作夜泊宣城界

孟浩然

襄陽

西塞沿江島南陵問驛樓潮平津濟闊風止客帆收去
去懷前浦茫茫泛夕流石逢羅剎礙山泊敬亭幽火識

一作

梅根冶烟迷楊葉洲離家復水宿相伴賴沙鷗

與南陵常贊府遊五松山

李 白

隴西翰林

安石泛溟渤獨嘯長風還逸韻動海上高情出人間靈
異可並蹟澹然與世閑我來五松山置酒窮躋攀徵古
絕遺老因名五松山五松何清幽勝境美沃洲蕭颯鳴
洞壑終年風雨秋響入百泉去聽如三峽流剪竹埽天
花且從傲吏遊龍堂若可憇吾欲歸精修

紀南陵題五松山

李白

聖達有去就潛光愚其德魚與龍同池龍去魚不測當
時版築輩豈知傳說情一朝和一作雨殷人光氣爲列星
伊尹生空桑捐庖佐皇極桐宮放大甲攝政無愧色三
年帝道明委質終輔翼曠哉至人心萬古可爲則時命

南陵縣志

卷四十二

藝文

十一

或大謬仲尼將奈何鸞鳳忽覆巢麒麟不來過龜山蔽
魯國有斧且無柯歸來歸去來宵濟越洪波

於五松山贈南陵常贊府

李白

爲草當作蘭爲木當作松蘭幽香風遠松寒不改容松
蘭相因依蕭艾徒丰茸鷄與鷄並食鸞與鸞同枝揀珠
去沙礫但有珠相隨遠客投名賢眞堪寫懷抱若惜方
寸心待誰可傾倒虞卿棄趙相便與魏齊行海上五百
人同日死田橫當時不好賢豈傳千古名願君同心人
於我少畱情寂寂還寂寂出門迷所適長鋏歸來乎秋
風思歸客

五松山送殷淑

李白

秀色發江左風流奈若何仲文了不還獨立揚清波載
酒五松山頽然白雲歌中天度落月萬里遙相過撫酒
惜此月流光畏蹉跎明日別離去連峯鬱嵯峨

書懷贈常贊府

李白

歲星入漢年方朔見明主調笑當時人中天謝雲雨一
去麒麟閣遂將朝市乖故交不過門秋草日上階當時
何特達獨與我心諧置酒凌歊臺歡娛未曾歇歌動白
紵山舞迴天門月問我心中事爲君前致辭君看我才
能何似魯仲尼大聖猶不遇小儒安足悲雲南五月中

南陵縣志

卷四十二

藝文

十二

頻喪渡瀘師毒草殺漢馬張兵奪秦旗至今西洱河流
血擁僵屍將無七擒略魯女惜園葵咸陽天下樞累歲
人不足雖有數斗玉不如一盤粟賴得契宰衡持鈞慰
風俗自顧無所用辭家方未歸霜驚壯士髮淚滿逐臣
衣以此不安席蹉跎身世違終當滅衛謗不受魯人譏

送通隱禪師還隱靜寺

李白

我聞隱靜寺山水多奇蹤巖種朗公橋門深杯渡松道
人制猛虎振錫還孤峰他日南陵下相期谷口逢

別韋少府

李白

西出蒼龍門南登白鹿原欲尋商山皓猶戀漢皇恩水

國遠行邁仙經深討論洗心向秋月清耳敬亭猿築室
在人境閉關無世喧多君枉高駕贈我以微言交乃意
氣合道因風雅存別離有相思瑤琴與金尊

訓張卿夜宿南陵見贈

李白

月出魯城東明如天上雪魯女驚莎鷄鳴機應秋節當
君相思夜火落金風高河漢挂戶牖欲濟無輕舸我昔
辭林邱雲龍忽相見客星動太微朝去洛陽殿爾來得
茂彥七葉仕漢餘身爲下邳客家有圯橋書傳說未夢
時終當起巖野萬古騎辰星光輝照天下與君各未遇
長策委蒿萊寶刀隱玉匣鏞澁空莓苔遂令世上愚輕
南陵縣志 卷四十二 藝文 十三
我土與灰一朝攀龍去龜鼈安在哉故山定有酒與爾
傾金罍

遊謝氏山亭 增

李白

淪老臥江海再歡天地清病閒久寂寞歲物徒芬榮借
君西池遊聊以散我情掃雪松下去捫蘿石道行謝公
池塘上春風颯已生花枝拂人來山鳥向我鳴田家有
美酒落日與之傾醉罷弄歸月遙欣稚子迎

答杜秀才五松山見贈

五松山在南陵
銅坑西五六里

李白

昔獻長楊賦天開雲雨歡當時待詔承明裏皆道揚雄

才可觀勅賜飛龍二天馬黃金絡頭白玉鞍浮雲蔽日
去不返總爲秋風摧紫蘭角巾東出商山道採秀行歌
詠芝草路逢園綺笑向人兩君解來亦何好聞道金陵
龍虎盤還同謝朓望長安千峰夾水向秋浦五松名山
當夏看銅井炎爐歎九天赫如鑄鼎荆山前陶公矍鑠
呵赤電回祿睢盱揚紫煙此中豈是久畱處便欲燒丹
從列仙愛聽松風且高臥颺颺吹盡炎氛過登崖獨立
望九州陽春欲奏誰相和聞君往年遊錦城章仇尙書
倒屣迎飛箋絡繹奏明主天書降問迴恩榮骭髀不能
就珪組至今空揚高蹈名夫子工文絕世奇五松新作

南陵縣志 卷四十二 藝文 十四

天下推吾非謝尙邀彥伯異代風流各一時一時相逢
樂在今袖拂白雲開素琴彈爲三峽流泉音從茲一別
武林去去後桃花春水深

寄韋南陵冰

余江上乘興訪之遇
尋顏尙書笑有此贈

李白

南船正當風北船來自緩江上相逢借問君語笑未了
風吹斷聞君攜妓訪情人應爲尙書不顧身堂上三千
珠履客甕中百斛金陵春恨我阻此樂淹畱楚江濱月
色醉遠客山花開欲然春風狂殺人一日劇三千乘興
嫌太遲焚卻子猷船夢見五柳枝已堪挂馬鞭何日到
彭澤長歌陶令前

南陵別兒童入京

開元丙寅寨山中作宣州刺史略知祥刻石山上

李白

白酒初熟山中歸黃鸝啄黍秋正肥呼童烹鷄酌白酒
兒女嬉笑牽人衣高秋取醉欲自慰起舞落日爭光輝
遊說萬乘苦不早著鞭跨馬涉遠道會稽愚婦輕買臣
予亦辭家西入秦仰天大笑出門去我輩豈是蓬蒿人

宿五松山下荀媪家

李白

我宿五松下寂寥無所歡田家秋作苦鄰女夜春寒跪
進彫胡飯月光明素盤令人慚漂母三謝不能餐

銅官山醉後絕句

李白

南陵縣志

卷四二 藝文

十五

我愛銅官樂千年未擬還要須迴舞袖拂盡五松山

哭善釀紀叟

李白

紀叟黃泉下還應釀老春夜臺無李白沽酒與何人

遊靈巖寺

韋應物

始入山路永獨欣山寺幽不知臨絕檻乃見西江流吳
岫分煙景楚甸散林邱方悟關塞渺重軫故園愁聞鐘
戒歸騎憇澗惜良遊地疏泉谷狹春深草木稠茲焉賞
未極清景期杪秋

夜宴南陵留別

李嘉祐

雲滿前庭月色闌主人畱客未能還豫期明日相思處

匹馬千山與萬山

青弋江

顧况

淒清回泊夜淪波激石響村邊草市橋月下苦師網

隱靜寺

張祐

清河

松徑上登攀深行煙靄間合流廚下水對簷殿前山澗
碧鳥聲迴泉清僧步閒更憐飛一錫天外與雲還

送裴坦往舒州經南陵

杜牧

京兆
舍人

日暖泥融雪半消行人芳草馬聲驕九華山路雲遮寺
清弋江村柳拂橋君意如虹高的的我心懸旆正搖搖
同來不得同歸去故國逢春正寂寥

南陵縣志

卷四二 藝文

十六

安賢寺

杜牧

謝家池上安賢寺面面松窗對水開莫道閉門防俗客
愛閒能有幾人來

南陵道中

杜牧

南陵水面漫悠悠風緊雲輕欲變秋正是客心孤迴處
誰家紅袖凭

一作江樓

自宣城至南陵却寄皇甫岳

王昌齡

江甯
少伯

與君同病復漂淪昨夜宣城別故人明主恩深非歲久
長江還共五溪濱

清弋江田舍

張賁

草木翳荒徑巖阿有竹扉童牛隨犂出乳燕哺雛歸釣艇橫幽渚耕蓑掛落暉罕知鹽酪味父子入城稀

南陵留別段氏兄弟

許渾丹陽御史

不知身老大猶似舊時狂爲酒畱山縣題詩徧草堂歸期秋未盡離恨日偏長更羨君兄弟參差雁一行

送南陵李少府

許渾

高人亦未閑來往楚雲閒劍在心應壯書窮鬢已斑落帆秋水寺驅馬夕陽山明日南昌尉空齋又掩關

送友人之南陵

賈島范陽主簿

休歎徒勞向宦途不羣氣岸有誰如南陵暫掌仇香印

南陵縣志 卷四十二 藝文

十七

北闕終行賈誼書好趁江山尋勝境莫辭韋杜別幽居少年躍馬同心使免得詩中道跨驢

送李頻之南陵主簿

許棠宣城進士

赴縣是還鄉途程豈覺長聽鶯離灞岸盪漿入陵陽野藏生公署閑雲拂印牀一作章晴天調膳外垂釣有池塘

送許棠還

張喬邑人

離鄉積歲年歸路遠依然夜火山頭市春江樹杪船干戈愁鬢改瘴癘喜家全何處營甘旨波濤浸薄田

送許棠及第歸

張喬

雅調一生吟誰爲晚達心傍人賀及第獨自卻沾襟宴

別喧天樂家歸礙日岑青門許攀送故里接雲林

送友人歸

張喬

落花兼柳絮無處不紛紛遠道空歸去流鶯獨自聞野橋喧碓水山郭入樓雲故里南陵曲秋期更送君

送南陵尉李頻

張喬

重作東南尉生涯尙似僧客程淮館月鄉思海船燈晚霧看春穀晴天見朗陵不應三考足先授詔書徵

隱靜寺閣

張喬

誰家煙徑長莓苔金碧虛闌竹上開流水遠分山色斷清猿時帶角聲來六朝明月惟詩在三楚空江有鴈回

南陵縣志 卷四十二 藝文

十八

達理殆應少惆悵僧閒因得話天台

送友人罷舉授南陵令

秦韜玉

共言愁是酌離盃況值絃歌枉大才獻賦未爲龍化去除書猶喜鳳銜來花明驛路胭脂暖山入江亭罨畫開

莫把新詩題別處謝家臨水有池臺

訪題進士張喬延興門外所居

鄭谷

平生苦節同旦夕會原東掩卷斜陽裏看山萬木中星霜吟欲老江海業全空近日文場內因君起古風

久不得張喬消息

鄭谷

天末去程孤沿淮復向吳亂離何處甚安穩到家無樹

盡雲垂野檣稀月滿湖傷心繞村落應少舊耕夫

亂後宿南陵廢寺寄沈明府

增

杜荀鶴

進池州

祇共寒燈坐到明塞鴻衝雪一聲聲亂時爲客無人識
廢寺吟詩有鬼驚且把酒杯添志氣已將身事託公卿
男兒仗劍恩酬在未肯徒然過一生

靜林寺

僧靈一

靜林溪路遠蕭帝有遺蹤水擊羅浮磬山鳴于闐鐘燈
傳三世火樹老五株松無限煙霞色瀟湘隱臥龍

入隱靜寺途中作

增

僧清塞

亂雲迷遠寺入路認青松鳥道緣巢影僧幃印雪蹤

南陵縣志

卷四十二 藝文

十九

烟連野燒谿霧隔霜鐘更遇樵人問猶言過幾峰

隱靜寺

僧清塞

一宿五松杯渡寺虛廊中夜磬聲分疏林未露上方月
幽澗忽生平地雲高鳥背泉栖靜境遠人當燭想遺文
暫來此地歇勞足望斷故園滄海濱

送弟令南陵

宋梅堯臣

宣城

新買紫騮馬欲歸清弋江去從琴鶴獨來任鳥鳬雙橈
實收盈筐醅醲熟滿缸弟兄相憶否風雨舊同窗

寄題南陵息亭葉閣

梅堯臣

竹裏有清館池中多藕花日光穿岸脚水影射簷牙柱

穴蜂歸響爐檀火過寒已知民訟息漉酒資巾紗

送達觀禪師雲隱歸隱靜

梅堯臣

栗林霜下熟歸摘禦寒冬帶月涉溪水過山聞寺鐘未
嫌雲衲溼已喜野人逢且莫似杯渡滄波與去蹤

食橙寄南陵謝舍人

梅堯臣

洞庭朱橘未全蒼裹水錦橙已變黃玉春擣齏憐鱸美
金盤按酒助杯香雖生東土名猶重未信南州客厭嘗
欲寄白苞憑驛去只因佳味怯風霜

隱靜寺

增

楊傑

進無爲

五嶺碧崔嵬雲深隔世埃寺從梁氏建僧自梵天來錫

南陵縣志

卷四十二 藝文

二十

井三泉迸松門十里開如今渡江者見說不浮杯

歸田

徐勣

邑人

懸車疏上動龍顏幾度陳辭始放還敢憶溪山孤聖眷
祇緣衰病乞身閒都門祖餞心情劇里社招邀禮數刪
最喜兒孫解農事稻花香滿舊田間

五松山太白祠

戴昺

機舟來訪寶雲寺快上山頭尋五松捉月仙人呼不醒
一間老屋戰西風

再按南陵

元劉錫

昔去是何日今來忽仲秋正愁簡書急無奈歲華流北

微廉頗陣西風王粲樓雲山與烽火心事轉悠悠

至正丙申郡縣士民哭張國岡公歌

增

梅根鄉有國岡公文武全才志氣雄亂時未登鄉甲第
胸藏韜略貫長虹護衛一方真保障民安物阜樂安康
四方紛紛兵火起惟有陵陽安如砥賊怒雙刀擾五次
劫庫擄民無休息岡公親戰十六日殺退賊首千餘級
臂挾千鈞勢無敵兵民猥弱官兵逃岡公奮氣胆愈豪
單騎血戰馬不停立斬賊將十三人三日三夜馬力疲
民有災難將星逝無奈兵窮墜馬力鐵甲將軍被賊執
岡公正氣若飛霜忠義赤丹真貫日指賊毒罵毫不屈

南陵縣志

卷四十二

藝文

二十一

賊怒持刀斷其膝凜凜生氣更何如千載標名烈丈夫
士民痛悼真無措哭誦一篇長短賦惟願此公流慶長
子孫蔭庇福無疆留記千年萬載揚精靈氣結猶昂昂
血祀千秋酬忠烈陵陽突起真豪傑

三友圖古風爲中山書隱賦

明任倫

君不見徂來之松幾千尺蒼虬倒挂青天碧又不見嶰
谷修篁十萬竿彩鳳雙棲翠雲溼獨羨南枝未著花百
草不敢先萌芽陽春一點漏消息孤山庾嶺飛瓊葩嗟
予本是烏臺客玉骨冰肌面如鐵繡衣金多立丹霄激
濁揚清奮忠烈卻憂慈母霜滿巔就良願坐儒林甞聖

恩浩蕩廣仁孝改官賜教南陵賢南陵古昔名春穀碧
瓦朱門總連屬雖無縣宰試牛刀絃誦風聲武城俗城
東佳士劉中山杏林藜閣相往還開雲日日種芳朮候
火夜夜燒金丹有時藏修事幽獨雅好梅花與松竹客
來煮茗汲清泉三疊瑤琴棋一局君子之心堅且貞歲
寒獨操孤高盟功名豈在大夫爵腹夢應知十八成古
稱平仲善交久君子道同宜素守我輩豈是蓬蒿人願
結歲寒三益友

過新酒坊

陳效

邑人

策馬經過新酒坊幾家茅屋樹蒼蒼籬邊啄黍黃雞嫩

南陵縣志

卷四十二

藝文

二十二

道上風飄白酒香古廟尙存唐事蹟殘碑猶載宋文章
無由得會謫仙子共向花間醉一觴

馬上懷章仲果

方如岡

邑人

迢迢念餘里之子情何厚下馬拜道周執手共時久寒
雲慘離顏細雨灑征袖單立子凝眸遲行我回首雖然
據鞍去不忍揚鞭走悞恨道路迂迴峰蔽前後啼鳥棲
深林幽花澁寒岫去去情何極斜陽盼西酉

朗陵山中

方如岡

策蹇游山匹騎輕東風去去漫爲情山花似欲留人住
明月還能送我行林外晨鐘消俗絆天邊孤雁動歸聲

朗陵丹井尋何處一曲滄浪且共聽

籍山署中

胡文靜 知縣

公庭一似野人家更有餘閒早放衙都把籍山西畔地
翦除荆棘種桃花

送何珍歸南陵

凌雲

進步怎如退步強冥鴻天外獨翱翔一官已洗塵中慮
三徑旋開雨後荒綠酒有時供客醉青山無復笑人忙
俗緣脫去重回首尹任夷仁孰短長

花山洞

桓係孝廉孫吳子當
歲貢棄去隱於花山

孫桓 邑人

誰把花山鑿得空碧雲洞裏更玲瓏小亭歌詠醉還舞

南陵縣志 卷四十二 藝文

二十三

間徑往來西復東一抹疎林斜日蔭數竿脩竹淡煙籠
我今深識其間趣底用名場利海中

春初至南陵

李先芳

行縣及春早梅花都未逢羣山爭倚翠落日故銜峰臘
雪藏深竹條風泛古松遙遙望城邑隔水度昏鐘

奎湖泛虛亭

奎湖十景之一

張真 邑人

一亭高矗水之涯杜老歸吟醉眼睜鷗鷺依迴仍戀舊
烟雲出沒自成家梅村沽酒邀仙侶梧渚乘舟理釣車
萬慮澄澄無一物天空海闊九秋霞

至日寓南陵

張元忭 紹興

陵陽館閣報晴鐘長至朝天拜舞同班列兩階渾序鸞
光搖萬樹擁飛龍青宮已進前星表紫塞還收不戰功
雲物不隨風土異都將書入客囊中

呂山漫興

汪景 邑人

木落山風靜池涵水月深乾坤留勝地雲鶴伴閒心酒
泛黃花飲詩敲綠竹吟扶筇時覽景幽徑似陶林
雙鬢垂絲白疏鐙對影紅風高驚落葉斗迴仰天空戀
闕慙才拙尋山喜路通何須爭跨鶴土室日安窮

贈浣谿釣隱劉柯

王宏道 邑人

汨汨溪中水行行溪上人乾坤一俯仰萬有隨奔輪有

南陵縣志 卷四十二 藝文

二十四

美誰家子岸幘垂溪綸溪水日以長溪魚時烹新一尊
且屬客共醉溪頭春溪雲出溪杳溪月印溪小溪鳥如
有情載歌溪樹杪卻疑此溪非尋常浣花故派來滄浪
桐江有線引風長與君并洗塵埃腸

工山削翠

王宏道

陵陽太白山摩空出層碧丹竈不知年飛仙振羽翼

潭水拖藍

王宏道

南來一帶水互地流碧瑤黃潦不敢入青柳映春潮

鵝嶺橫雲

王宏道

右軍何年過遺此籠中物化作飛來峰長有雲氣覆

元功書院

王宏道

抗言當嚴廊來救青苗苦回首臥經綸英風冠千古

元觀仙題

王宏道

何日元都壇天風落仙唾白雲或臨軒恐復異人過

龍池布雨

王宏道

神物非凡鱗養性澄潭底乘時雨太虛乾坤一帶洗

過太白酒坊

許夢熊 邑人

謫仙過日酒初熟此日猶傳新酒坊風度不隨茅屋在山川猶作錦衣香千秋客到千留珮一歲花開一舉觴莫向斜陽嗟往事人生不朽是文章

南陵縣志

卷四十二 藝文

二十五

玉帶橋

許夢熊

萬丈溪頭起白虹宛然飛渡籍山東孤懸上挽天河水並駕中流碧柱峰卻遶翠微三匝外盡收春色四圍中山川人物如相待會見清時策上公

清弋波光

方海 邑人

長江渺渺界西東縹緲波光弄小風疏月迴搖千頃白落霞平散一川紅客行舟楫如天上人鑑形容似鏡中最喜澄泓清見底塵纓欲濯有誰同

南陵梅杖

舒本忠

揀得南枝數尺長霜皮猶帶蘚痕蒼扶時賴有登山力

倚處應疑帶雪香庚嶺拖雲春寂寞孤山挑月夜昏黃醉來獨坐橫窗下卻訝逋仙在草堂

寄林南陵

湯顯祖 臨川進士

雲覆春穀溪濤聲何澎湃明珠耀專城輝光照行邁躍馬過藍山披雲向君拜達人自疏豁无言每相解人占射的春化挹陵陽派蠶女被桑柔龍鱗集川滄樂土未能詳屠門且應快別子新林橋送我天門界宦遊身軼掌心跡竝清灑適願非邂逅交終義爲戒

南陵道中別林明府

湯顯祖

春穀春光滿綠疇石竹明湖葱翠流何如神仙令鳴琴

南陵縣志

卷四十二 藝文

二十六

松桂幽士女見林君歡如鳳出遊君不見湯生漉酒不入口獨飲林君半杯酒

寄林南陵

湯顯祖

日飲朝霞春氣開陵陽仙令築亭臺至今五色丹泉上猶似吹簫白鳳來

望華樓

沈堯中 知縣

陵陽自昔稱三輔疆域表延吳楚間坐鎮崇臺懸北斗憑虛高閣對南山屏開雲帶秋光遠簾捲芙蓉夕照間遙憶子明垂釣處烟霞猶自鎖元關

白鵲樓

沈堯中

危樓百尺稱雄鎮靈鳥徘徊瑞靄濃東向時因知太歲
南飛端爲挹薰風光搖碧漢銀爲縷色映瑤池雪作宮
莫向漢廷希爵賞從來學製愧無功

靈雉臺

沈堯中

十里山城繞澗開崇臺危峙紫雲回花封露湛青槐合
粉堞風微白雉來北望神京依玉斗東懸文筆聽春雷
太平盛世多奇瑞喜見祥光燭上台

公餘感興

沈堯中

庭草青青荏狂虛子規啼處樹扶疏年來水旱猶難卜
詮次三吳水利書

南陵縣志

卷四十二 藝文

二十七

讀何文明都諫集

吳萬全

教諭

諫闥當年數直臣高風勁節孰爲倫遺書猶可臨天日
素志眞堪質鬼神青瑣一官同郭屋黃門累疏動楓宸
還期血食光尊俎留得餘馨啓後人

許民部見過

申時行

吳縣
宰輔

邱壑春深但索居蓬蒿今日爲君除過逢並是抽簪地
感慨猶存伏闕書屈指人才無上駟驚心世路有前車
年來意氣何須問一榻高眠萬事疏

贈沈督府錄凱旋

李 昫

朝鮮

出使樓船截海行水犀十萬下神京埽凶只借將軍力

存國還知聖主情風捲鯨波秋欲靜星開虎帳夜偏明
釜山不減燕然石從此天家更勒銘

寄懷戴華邱

朱之蕃

上元
修撰

愚公谷口好棲眞管領鶯花不計春杖擁煙霞迷鶴壑
尊傾賢聖倒綸巾松篁不逐韶華老蘭蕙仍將雨露新
爲問蒲輪徵有日何如清詠勝天鈞

送管五陵奉使南還

湯賓尹

宣城
祭酒

把袂同當遇帝初彈冠此際意何如還誇漢節承新寵
豈爲吳歛返舊廬送別一聲杯底淚寄回千里夢中書
近來心事憑君語狂病仍銷蠹字魚

南陵縣志

卷四十二 藝文

二十八

工山削翠

梅鼎祚

宣城
進士

白雲飛去又飛還萬壑千巖指顧間天半芙蓉爭削翠
案頭一點是工山

鵝嶺橫雲

梅鼎祚

爲問金鵝事有無岩巒嶺疊片雲孤陵陽自昔稱仙令
化作翩翩葉縣鳧

南浦甘泉

梅鼎祚

汨汨流泉引派長輓轡金井纏銀牀鄴渠十二君休羨
南浦人稱玉女漿

玉龍橋

梅鼎祚

百尺飛流百丈峰鏡中螺黛寫重重秋來半落明河水
十二銀橋鎖玉龍

射的占豐

梅鼎祚

幾載人看射的元秋風陌上鼓闐闐鹿門舊有移家興
乞種南陵附郭田

西溪積雪

梅鼎祚

溪流春穀淨纖塵玉樹森森欲照春卓蓋好從西去問
雪中高臥豈無人

奉冊使朝鮮

施善教
邑人

天語如綸下建章東風忽動去朝陽燕王臺上黃金餉

南陵縣志

卷四十二

藝文

二十九

箕子村墟白草芳旂影龍蛇輝國使笳聲鳧雁肅邊疆
十年壯志橫孤劍歷盡關山渡海航

蘆渚

施善教

秋水澄清映碧空芙蓉零落彩雲紅數聲野笛橫牛去
吹遍蘆花兩岸風

石潭

施善教

誰濬石潭萬丈深娟娟明月印波心天光倒影寒芒色
驚起驪龍不可尋

飲張春宇山園

管橘
邑人

城頭山色淡晴煙高閣追陪興自偏三徑黃花秋未老

百年白社句誰先殘星半落空尊酒明月全低欲曙天
此夕同遊爭作賦德星不數聚當年

將歸潭上寄管伯顧

許以忠
邑人

留滯長安久風塵已敝裘蛾眉徒自愛駿骨竟誰收聽
雨驚鄉夢看山想舊遊何時潭水畔把酒話綢繆

送黎邑侯入覲

許以忠

春穀祥光映日華欣看輯瑞帝王家班先萬國賢聲著
最滿三年寵命加天上帶回新雨露境中重潤舊桑麻
憐余未得從公邁獨有迢迢望眼賒

朗陵丹井

程文繡
邑人

南陵縣志

卷四十二

藝文

三十

聲沸寒泉溢仙井朗陵高處擅奇名那無石眼通滄海
自有丹砂浸碧泓地脈不勞神禹鑿山靈曾慰謫仙評
誰知一勺源頭水占斷龍湫萬古情

將之甯波偶過靈山寺

戴新
邑人

萍蹤浪天涯不識靈山路撥雲一逕通參差排老樹龍
井白練飛螺岫青鬟露雞犬隔岸聞村墟半煙霧况有
素心人日涉以成趣何日脫簪纓結茆此中住

九日同新昌朱令遊南明寺

劉有源
邑人

秋氣來溪上名山入眼新倚天開石座嵌壁聳金身月
印松門隙泉分雲漢津莫辭今日醉勝地共芳辰

涉園卽景

劉有源

幽棲小築傍溪隈選勝潭淮迴絕埃兩派遠從山澗落
一泓近抱草堂來浦連隄樹雲常暗波映軒窗影倒開
曠絕橋頭深夜月移情恍惚向蓬萊

輓何都諫朗峰

余敬中 廣東廉使

黃葉西風急青山落日昏百年桑下淚萬里爲招魂

輓何朗峰都諫

吳時來 都御史

故人鄉里偶過臨宿草萋萋馬自停苦抱半生憂國淚
含淒忍復說南陵

水龍洞玉乳泉

楊茂清 邑人

南陵縣志 卷四十二 藝文

三十一

浮雲不並此山巔屹石盤空枕逝泉千仞灑來蛟淚輭
一潭拋出蚌珠圓濯纓對照清於聖洗盥重傾冷欲仙
落野成溪資灌溉長歌幽雅賽豐年

潭水拖藍

徐希明 上虞別駕

誰染輕綃百里纏浮光遙接蔚藍天詩脾淨洗塵氛盡
一曲滄浪煙水邊

南陵道中逢大雨晝夜不絕山水驟溢平地至深
尋丈行者俱不能從余爲多方獲濟得至晚上因

感賦二首 增

黃尊素 餘姚進士

漫說輜軒使者旌從來行路嘆欷傾塞野連雲迷古道

波光一片暗心驚險如萬騎驟馳突望若平地捲長鯨
初試纔及行人膝須臾馬鬣已縱橫呼吸之間身世外
從者杳然失死生居人遮道慙慙訴如此風波豈可行
總爲浮雲蔽日明豈無攬轡憶澄清從爾掀翻我有主
洪濤滿眼心不驚重賞之下勇夫出木罌之中可渡兵
有時啣枚踰深澗有時利涉任舟橫投軀暫寄風宵息
長嘯看雲波自平尋常禮套無勞爾相從用命即豪英
濟世應有微權在如此風波亦可行

蔣溪卽目

戴士憲 邑人

蔣徑人誰到傍溪寄興孤光分新月上影淡夕陽餘秋

南陵縣志 卷四十二 藝文

三十二

熟紅皮芰寒飛赤足烏尋盟鷗亦得現在是安孟

潭河春泛

戴士憲

家臨春穀一沙潯咫尺桃源路可尋燕掠蓬迴搗鼓轉
鳧浮雛唼扣舷沈波心拽白魚鱗現水面拖藍柳黛深
斷續漁歌何處所輕風吹到亦知音

竹塘橋

管一驥 邑人

山邊行路古竹外石橋斜水漲尋他岸煙橫隔幾家千
迴旅店月一片牧歸霞興到思沽酒無錢倘肯賒

過青弋江作時赴戍宣城

姜琛 萊陽給諫

垂老天涯夢遙期歲月長可堪江在此誰問客投荒斷

嶺寒鴉盡頽崖古木僵荷戈還獨去生死白雲鄉

送徐伯廉歸南陵

僧宗泐

天界寺

把酒城南道離懷去住同鳥啼紅樹裏人在翠微中山
雨添秋色溪雲度晚風倚樓相憶處明日各西東

喜董婿過休庵適自龍州回

清盛於斯

邑人

數載留西粵孤身歷百蠻啼猿愁落日野鬼嘯空山劍
剩流星鐵弓餘挂月灣奎湖仍在劇喜得生還

贈別甘明府太弢

二首

盛於斯

杜鵑聲裏送行舟唱徹鷓鴣雨未收蕩漾春江流不住
相思一望兩悠悠

南陵縣志

卷四十二

藝文

三十三

莫惜傾尊千里分勞歌何事慘離情筵前一片青天月
猶照潭流徹底清

莊浪祭九世祖本七公墓志感

秦仁管

邑人

沈寥莊浪道淒其水木心古徑號悲風寒煙縈墓陰苦
寫任俠事重聞澤畔吟征人抱風義行路泣古今百年
消息斷萬里夢魂沈鳴咽求遺蹟寂寞落荒岑魂無所
不之神誰得而禁性醴聊將意肝薌或居歆此去杳難
託將來孰繼尋慘淡搖魂魄感慨涕沾襟

奎湖

秦仁管

湖濱村落參差桑麻被野汲者灌者畧且釣者

靡不畢集然初固逝水也予祖德滋公於宣德
間沼之而後泓然湖矣丁丑秋同羣三四人載
月而遊蓮葉障水紅碧接天墜粉繁香衣裾恆
滿花盡處水映月光晶彩澄徹如琉璃萬頃微
風蕩漾紋縠如練緩棹久之抵湖頭買醉而歸
居傍奎湖水能習湖上路巨浸環百里支流不知數或
曰九十九曲折湖中注鬱葱氣佳哉參差影古樹藤蘿
暗若園中有人家住雞犬隔岸聞村煙升朝霧況有素
心人日涉以成趣長林適野性幽禽啼白句一葦縱所
之移我瓊瑤圃鼓枻漱其流鬚眉清更嫵菱荇點白沙

南陵縣志

卷四十二

藝文

三十四

鯈魚驕不响藕葉迴無塵接天青似簾繁香襲衣裾墜
粉紅疑傳不數濠上游奚有錦帳步銀海漾月明金蛇
憑浪渡清芬不待招夜涼能自足萬頃琉璃徹凌波灑
寒露輕風織冰紈奇文一望度長嘯俯湖頭水木生我
慕其下隱神蛟持綸不敢顧回棹如旋乾星辰倒影布
清狂入夜分助詠醉良點

遊工山

秦仁管

生與工山俱不識山何似秋日望山色朝青暮能紫策
騎出西郊度林山如咫尺靄收天地浩然化爲水霜風
吹客夢驚聽濤聲起曉嗽推宿暈澄霽方徒倚怪石蹲

上頭陡拔不可通奮足越嶙峋卻顧肯自止攀蘿上際
天此際堪千里笑指壁立山俯伏渺數蟻曩時極目處
今反在其底遙揖芙蓉峰逡巡不敢齒江水衣帶間盈
掬顧可醺醺茲東南畝千塍錯繡綺披襟清冷風天籟
足角徵孰與弔古烈忠孝立人紀願言訪遺丹修真跨
赤鯉

湖上即事

秦仁管

溪流繞屋急曠望碧煙圍豆點梅枝小霞蒸桃萼肥懸
巖餘鳥跡瀏石瀉龍威深飲迷來路高歌指翠微

送秦尾仙視學關中

孫廷鈺 益都

南陵縣志 卷四十二 藝文

三十五

黃河西去古秦京太華峰邊漢月明薦達共看新節使
文章先起舊諸生金盤宵接仙人掌銀漢秋懸北斗城
見說當年何仲默如今風調更齊名

聶明府晚宴籍山亭

施閏章 宣城

清夜飛鳧鳥華燈勸鶴觴歌翻白苧舞坐泛碧荷香傲
吏親書卷秋山入草堂從來習池好倒載興難忘

送何生伯還南陵

施閏章

春穀城邊路三年夢渺茫送君折楊柳揮手見江鄉魚
鳥依人近荷葉滿縣香塵纓良可濯切莫負滄浪

何生伯示近詩兼約文瀾亭野眺 增 施閏章

不到朗陵三十年舊時遊好心茫然窮交握手開雙眼
見面論詩手一編半世煙霞供爛熳幾人歌醉足纏綿
危亭縱目還能否亂後溪山倍可憐

南陵長至值雪 增

施閏章

晝霧經旬覆復陰良辰雨霰晚相侵請冬久望占年雪
倦客棲違行路心穀水交流寒野寺工山千仞失雲岑
軍麾人事催遲暮多難微陽何處尋

文瀾亭和生伯

同范魯生茅楚畹王左星

施閏章

安賢古寺殘鐘在百尺危亭復此杯楓落檻前千樹白
雲移天際數峰來孤城地合漳淮水異代詩留李杜才

南陵縣志 卷四十二 藝文

三十六

朋舊風煙閒不易夕陽歸騎漫相催 亭在龍會橋上漳淮二水交匯杜牧
之有謝家池上安賢寺即此地李太白遊南陵亦有詩

留別南陵屈明府君賜 增

施閏章

頻年書到宛陵城良會疎梅帶雪清客病多慚投轄飲
官煩偏重繫駒情論才物色空逢掖得算安居過甲兵
雨後試聽春穀水潺湲時送夜琴聲

劉蓮菴進士歸南陵省親 增

施閏章

浮雲馬首惜相違客舍鄉情似汝稀南浦暫辭金闕去
北堂親見綵衣歸文章價重還清秩亭館花深接翠微
鮑氏乘驄君舊業莫因調膳戀漁磯

劉蓮菴舍人書至

增

施閨章

關情千里意何如
雪夜燈前細作書
畫省苦吟從寓直
臺高極目悵離居
山園入夢家仍遠
星使還鄉計已疎
聞道北堂身轉健
朝朝含笑進江魚

柏林寺

管嘉奎

邑人

柏林古寺傍山開
古柏於今安在哉
過客馬蹄通白鶴
遺碑鳥跡掩蒼苔
鐘分峻嶺穿雲度
僧汲寒塘戴月回
更喜荒齋岑寂後
香風時送梵音來

春燕龍會橋

湯原清

教諭

柳茁花穠山城路
樓鞋菱袂春郊步
迢迢深水跨彩虹

南陵縣志

卷四十二 藝文

三十七

收拾西南波會聚
陡見文瀾亭子邊
紅雲萬朵插青天

脫巾一嘯落星斗
且吸長江千斛酒

春晴偕友攜琴樽
憩籍山書院

湯原清

皎好風光喜十分
憑高四望綠紛紛
無人院宇花開落
多景亭臺樹夕昕
嫩柳欲驕松柏翠
殘梅將謝杏桃芬
閒情獨寄平疇遠
春思紛來敲席醺
一曲幽絃纔罷弄
數聲啼鳥正相聞
斜陽芳草遲歸去
玉樹臨風自不羣

送秦尾仙司樵燕關

楊世學

當塗

眉州文章少游後
迴風紫海吞羣岫
啣來使節出層霄
平林霽雪光如瑤
不道商飈遍擁呼
東南民困半教蘇

冰心但溯三巴水
萬里清波月一湖
身乘大川與廣谷
會須作楫揮甘霖
鴻飛今夕袞衣還
早見夔龍推二陸
何況度支前代賢
入告嘉猷正著鞭
澹雲高漢天光爛
瞻望青旻鸞鳳鶩

遊工山

謝天申

邑人

路折山迴峯萬里
重重滴翠含空濛
遙指一峯最蔚秀
獨插天半如芙蓉
我欲高踞芙蓉頂
宛轉先度神龍井
不見神龍躍碧天
惟見空巖白雲冷
白雲巖畔白雲封
小徑斜穿忽漫通
凌虛飛步最高處
此身已造芙蓉峯
峯前峯後青繚繞
笑倚長空俯飛鳥
回首龍井瀉清泉

南陵縣志

卷四十二 藝文

三十八

萬丈銀河落縹渺
縹渺陡來鐘數聲
聲聲敲出白雲情
尋聲欲訪雲中寺
天風吹斷暮煙平
煙平日暮清如水
一巖月色冰壺裏
長嘯歸來骨欲仙
愁化輕煙憑風起

靈泉寺

謝天申

問水更尋峯靈巖
忽漫逢層層圍竹
樹面面削芙蓉到
寺饒秋色搜奇奈
晚鐘明朝期再訪
只恐白雲封

白雲山

謝天申

霧隔忽然開憑虛
躡翠苔嵐光迎袖
落溪色拂琴來愛
靜聽幽鳥尋香折
古梅莫辭歸路晚
明月照人回

崑山遊紀事

劉篤生

邑人

市樓望崑山崑山青在牖次陟大山頭羣峯皆我友邀
歡興正豪雲倏抱山走歸宿朗公房惴惴豺虎數晨起
望崑山岩巒尙昂首迤邐七里多忽驚一壁陡努力直
上躋氣喘皆張口昨苦陡大山大山今培塿所欣夕照
佳陰霾化烏有引憩老庵中庵側天池瀏纔坐雪花飛
空林風若吼游覽總未周惆悵降平阜靈境洵多奇歷
覽將八九飛策窮名山茲緣良不偶

龍會庵

梁標 邑人

芳草離離遠接天蒙茸一片翠茵連空中色相飛花雨
遮莫遊人醉欲眠

南陵縣志 卷四十二 藝文

三十九

靈山寺

梁材 邑人

萬峰廻合此中攢怪石清流逐徑盤杯渡不知何處去
空留古剎作遊觀

漁舫

何天駿 邑人

擁翠西南入畫多閒園攜蓋且高歌無他花樹留塵眼
坐愛長松挂薜蘿

香山寺兼眺來青亭

劉宏基 邑人

寺徑沿蹊曲陂廻看塔斜板梯纜挂鐵踏磴石生霞檻
轉青來遠亭開秀若矚望中城郭是幽動忽長嗟

登工山

梅清 宣城人

巔崑工山巔際天峰獨美俯睨東南隅千巖列展齒大
江匯其下如帶明秋水拱手忽長嘯空濛見九子空谷
風泠泠一泓響雲底云是古龍湫飛濤灑千里我呼朗
陵侯何處應聲起

前題

何一化 邑人

工山封域鎮萬丈鬱蜿蜒言偕曠達侶千折躋其巔茫
茫擴方宇崢嶸孤蹈天遙對碧芙蓉長江一帶纏百里
蓄風氣岡巒散芊眠引臂行翠微窅靄招神仙金支共
翠蓋天際或遷延黑雲歛決滂下視如重淵羣峰若鷗
鷺出沒互後先搖搖恐墮墜捫漢不可緣長風捲雲盡
南陵縣志 卷四十二 藝文

四十

暮色愈娟娟奇態出無窮心目眩屢遷松風吹碧落肌
骨化輕煙

遊水洞

何一化

天創奇險區元氣伏窈墨石骨峻峻嶒噴沫出剝蝕屋
壁疊鱗紋揉雜丹青色經營想鬼工手蹟尙可識黝然
窺豁訝龍窟宵無極心魂奪幽幻逡巡留不得歸去鍊
神明再履非常域穿涇捫氣機摩崖飽繪飾乃識造化
心終焉敢辭力

七星橋

何一化

竹籬石徑野人家飯煮黃精蕨點茶老叟不知春至久

空山笑指辛夷花

射的山

邑人

雙峰懸碧落，嶺峯鎮金方。拔地蓮無蒂，開雲劍有芒。雨

陽來社賽，元白卜年康。終古何人射，凌虛鵠翼張。

九日登倚劍臺

陳玉璣

武進士

去年躡屐敬亭隈，今日攜尊倚劍臺。丹嶂倍宜秋裏看，
黃花恰向客中開。關心詩賦逢人寄，回首家鄉望使來。
後會不知何處是，漫漫風雨更相催。

龍池禱雨

屈升瀛

知縣

禾與民同生，一雨均當澤。無禾是無民，久旱懷愁絕。吁

南陵縣志

卷四十二

藝文

四十二

嗟舉大雩，徒然牲璧竭。夙聞龍池靈，泓然工山脊。雲氣
一縷生甘霖，徧阡陌。千層躋危崖，深碧生寒冽。傳道通
江湖，信是神龍窟。匍匐偕士民，傾注冀倏忽。厚澤龍豈
慳，涼德吏有責。黑雲隨我歸，庶解倒懸厄。

登望華樓

屈升瀛

公餘倚官閣，九子入雙扉。滿縣荷香集，沿城雲氣飛。酒
坊仙蹟杳，松館夕陽微。何處秋聲起，空階獨鶴歸。

自南陵至下坊

增

靳治荆

遼陽府

南陵風物迥清嘉，漸入雲山徑。路賒城外石，橋通竹筏
水。邊茅屋住漁家。

深夜投宿南陵

增

程瑞社

休甯生

燈殘人睡穩，策蹇客方來。成柝因風急，星河近水開。蹉
跎華髮改，辛苦壯心灰。旅店堪高枕，荒雞且慢催。

渡青弋江

江在

陵

增

徐元文

崑山大學士

來過青弋水，古渡一槎橫。輕淺浮沙色，空澄漾午晴。人

家波外靜，津樹望中明。甘冽曾何匹，泉經未得名。

南陵

增

程正揆

孝感侍郎

策蹇南陵道，風光入眼明。舊家喬木健，老岸石梁瑩。青
嶂羣山合，白蘋一水泓。輕鷗來淺瀨，爲憶謝宣城。

涌珠泉

王震

邑人

南陵縣志

卷四十二

藝文

四十三

訪古華陽宅，流泉鳴喜客。客亦喜，泉流清芬沁人腋。不
謂茲山中，若與仙源通。連珠涌地起，根底於誰窮。天地
大竅不可測，鬼斧鑿空漏海國。一氣噴沫千尺巖，舍利
牟尼波中得。我昔弄珠坐石上，石腹隱隱如雪蕩。細心
貼耳毛髮寒，疑有神濤相莽沆。誰識此中奇，迥異華陽
池。嗟生冷落地，宜乎人罕知。當年若遊元暉與李白，碧
玉闌干詩滿石。

避暑俞汝諧斗園

王震

梧深雲欲冷，亭靜暑如秋。有客清於水，無風晚亦飈。月
痕描枕淡，花氣撲幃幽。一夢羲皇上，渾忘大火流。

泮宮塔頂古柏

劉 暉 邑人

巖宮寶塔梵宮遺絕頂何來古柏奇雲露自濡青黛色
天風不礙歲寒姿根廻鐵釜徵靈異文重乾陵鬪陸離
最喜昇平饒勝事濃陰留得到今時

贈何介吉西行

劉細武 邑人

冒死甦民不恤難公忠獲罪重如山陵陽父老咸西望
壯士長歌笑入關

望華樓贈屈明府

范希曾 邑人

西峯黃鶴頂東俯鳳凰臺宿霧四天捲華峰九子開檻
憑雲滿袖手摘斗爲杯坐撫絲桐靜絃歌下里來

南陵縣志 卷四十二 藝文

四十三

涉園和葉芸若韻

劉 楷 邑人

林園春寂寂風雨去還留客枉蒼苔徑亭橫碧草洲鶯
知移樹嘯雨不避人遊霽色今朝好新詩次第酬

靈山雜興 二首

劉 楷

別山三十年苦憶山中靜雲深鳥不知天外一聲磬
衆山東一溪溪流遶山外時有問津人桃源聞犬吠

斗園夏憩同方位齋諸友

茆薦馨 宣城修城

葱鬱春穀城幽栖能卜築急雨瀑方池梧葉涼書屋主
人高且賢筆墨安窗腹良會此時難吐辭須萬斛我從
壁上觀蛟龍走尺幅五斗酒共傾莫便老松菊

龍灣松居

方 仲 邑人

斑駁龍鱗蹙森沈鶴影藏幽居忘歲月松老耐風霜
送劉光祿蓮庵歸養 沈朝初 吳縣

之子中朝望何爲獨去官直聲留瑣闥歸興寄層巒致
政恩猶渥還家夢始安朗陵秋色早三徑足盤桓

題墓園 二首

梅 庚 宣城

但覺爲園好翻思闢地初依城收野樹引水就階除客
共煙中釣兒繙架上書落成纔幾日花藥已扶疏
漫擬王官谷新開綠野堂陳情遲令伯愛日過潘郎地
貴金爲埒天低石作梁滄洲從暫臥仙嶠在陵陽

南陵縣志 卷四十二 藝文

四十四

輓孫總戎鍾山 三首

梅 庚

移書馘賊保危疆延頸千回齒劍芒遺墨數行眞鐵漢
曾親丰貌果昂藏

三年一體孝思通

武職丁艱自孫始

移孝方能教作忠從此兜

牟皆自盡始知至性本英雄

能明大義爾何知

謂義僕張祥

百折相隨死不辭帳下餘生

還戀主肯教南八獨男兒

寧鄉解組留畫朗陵山水

王三錫 邑人

故里雲山夢裏牽初衣得遂興悠然好尋籬畔黃花醉
更就松陰白石眠落葉紛紛飄晉水飛鴻陣陣逐吳天

臨岐爲寫陵陽景別後遙應憶輞川

漁浦

劉阮 邑人

桃源誰信在人間靈境周遭碧水環入徑煙雲隨杖轉
生新邱壑引心閒輞川秀句垂千古漁浦幽尋隱一灣
風景自今增勝槩竹坪花塢共追攀

同劉文海遊管氏園林

梅瑒成 宣城文學

縱目驚空闊園亭抱水寬藥畦平野合花塢綠雲攢時
事同基局高懷把釣竿此間堪永日莫漫問歸鞍

白衣庵

蔡瑤 宣城

細路繞清澗平疇散綠秧脫冠攜道侶看竹到僧房幽

南陵縣志 卷四十二 藝文

四十五

閣黃鸝語新竇紫筍香溪風正亭午小坐一單涼

靈山寺小閣

蔡瑤

山僧能解住山趣小閣疏窗倚澗開一夜流泉高枕聽
夢疑仙液過峰來

工山小庵有懷何孝子

謝陞 邑人

石磴蟠雲曲徑通茅庵一點翠微中若非有晉高人在
安得茲山維嶽同碧落靈泉朝涸雨幽巖老木夜嘶風
千秋不朽倫常地塵世紛華轉瞬空

經吳伯陽先生故里

謝陞

西來山勢最嶙峋拔地轟天大有人唾罵鄒藍爭一死

三巴風雨泣孤臣

倚劍臺

王行仁 邑人

倚劍臺邊多古松藉山塘種水芙蓉納涼閒步長隄上
城北城南處處鐘

玉帶橋

劉應湛 邑人

闌闌東西一水分飛虹千尺鎖溪雲曉風楊柳人閒立
繞郭黃鸝百囀聞

次青弋江訪友不值

袁啓旭 宣城

青弋江頭一葉舟山光雲影共沈浮門前多是桃花水
未到春深不肯流

南陵縣志 卷四十二 藝文

四十六

春過黃墓

劉學尹 邑人

黃墓名垂遠忠魂應有知碑殘無幾字樹老剩餘枝古
塚棲狐冷荒原宿鳥悲桃花今日淚灑作帛墳詩

過王殿維漁浦別業

魏壽期 繁昌侍御

東臯聯杖履攬勝輞川莊密篠亭全隱微雲水共長門
常關栗里石應拜襄陽人境無車馬花谿足徜徉

送王適園明府解組旋里

王鑑 繁昌孝廉

竹馬甫歡迎攀轅倏祖行期年俄報政百里已留名摩
詰丹青擅監門圖繪呈批離方保聚

勿重含情

時值荒歉蒙請賑全活甚衆能

南陵每歲六月廿八日鄉民聚集城東門日用需
物畢具交易而退名曰扁擔會詩以紀之

梅兆頤 宣城人

春穀人家重樸素國風爲誦唐魏詩心臧惟有土物愛
純藝黍稷倉千斯即此日中一爲市奇技淫巧原無之
席地紛陳遍郊野一一無非耕織資土產由來多竹箭
百物半取霜筠爲喧闐人聲朝及夕頗是盛事毋相嗤
惡俗賽會侈遊冶士女雜沓兒童隨我歎舉國若狂耳
惟此會堪千古垂

同諸子步月玉帶橋

劉燾 邑人

南陵縣志 卷四十二 藝文

四十七

秋高夜靜明河直絡緯蕭蕭聲乍息一鏡橫空絕片雲
金波潑灩光如拭乘興歡呼結伴遊石梁散步城東北
爲愛佳名自昔傳翻驚勝地疑初識花竹數重亭榭深
夾岸露華含彩色平沙宿雁影微茫點就輞川圖半幅
歸來人語隔窗紗徙倚還欣繞庭側

紫巖書屋落成

劉燾

隙地豐泉石都由漫興成數峰當戶秀一鑑入簾清桐
引春雲曙荷翻夏日明老親杖履適指點笑滄瀛

慕園即景

劉沛 邑人

小窗清漏永曙色羃空林相對樽同泛時還鳥伴吟文

章期見性俯仰欲忘心麗澤偕朋好鍾期自賞

過朗陵贈汪湘人明府

翟湘 涇縣人

蓮幕燒殘蠟泪紅遠從天際問歸鴻雲山訪戴初移棹

時訪顏博洲刺史於義安桑梓依劉又轉蓬百里甘棠傳惠政一颺

冬日快長風阮生正有窮途泣喜接旌旗道路中

朗陵士庶我鄉鄰來暮興歌夙願伸岸柳喜含時雨意

江梅遙動故園春可能廣廈遮寒士便借青山作部民

設在鳩茲潭水桃花依樣好深情終古一汪倫

紀災

陶瀚 邑人

宣歙萬山叢我陵羣流赴戊子五月中旬日雨如注陵

南陵縣志 卷四十二 藝文

四十八

谷遍蛟宮廬舍沒泥汙禾稼正盈疇波臣盡捲去藜藿
計全無哀嗷誰與哺斗米鬻兒女骨肉不相顧豈無良
司牧赤手空噢咻分卹仗義民□粥春回向無何疫癘
侵纍纍屍骸露刺史進飛章常平蠲夙貯溝壑起餓夫
近遠恩膏佈過此望屢豐螟螣復爲蠹糴穀賣新絲百
計延朝暮剛到十年來蛟螭攪舊路戊戌六月杪黍實
離離布村酒薦新粢比閭訂歡豫皇天降鞠凶轟雷心
膽怖昏夜覆居巢漂沒仍如故攀木作猿猱啼嘶慘不
住可憐白浪中駢首充魚餌死者亦何辜棺骼泛如鷺
吁嗟此橫災何故頻年遇居常賤五穀驕侈天譴怒籌

荒須儉勤耕九三年裕丁甯梓里人彌災惟省懼

文廟告成紀事

方于珣 孝廉

聖邁禮逾崇俎豆虔秩事追恩及先代文物增嚴邃足知垂教端根源數仞地夙夜仰殿庭譬工則居肆恢拓敢辭勞鼎新順衆志陰陰桃李蹊穆穆宮牆闕蔚爲學道宗絃誦宣和氣泮水日澄清栝柏日竦翠似聞康成舍書帶還生祀共瞻文在茲千秋故未墜

題劉虞百公衡容圖

周在建 祥符

水石文心構軒窗頓覺殊女牆羅萬疊老樹影千株卷軸東西並塵氛纖介無愛君同閱閱喜我結陳朱

南陵縣志

卷四十一 藝文

四十九

過南陵宿紫巖書屋

陳以剛 大長進士

綠樹臨官道春城雉堞間潮分中港月雲重朗陵山舊雨頻年別高譚竟日扳鬚眉留我輩一破客中顏

香由寺

陶性 邑人

南國知名寺危樓半欲摧松颿緣碧樹巢鵲下蒼苔一水喧虹影千秋靜遠埃老僧開歷日移得竹枝栽

文廟重建告成紀事

劉文峙 邑人

宮牆重締構趨事敢徘徊松自徂來得柏從新甫來雲旂時陟降霄漢仰昭回幸際崇文日應多濟世才

前題同賦

王握 邑人

趨事亦忘勞宮牆數仞高敢言增美富略識剪蓬蒿學向勤中植恩從格外叨聖朝寬養士切莫負甄陶

山口

劉攜 邑人

曉岫收殘雨衝泥問酒家古藤穿怪石一徑落閒花山抱村煙轉溪尋野釣斜南鄰多舊伴相就話桑麻

拍林庵訪丁削山不遇

徐燕 邑人

爲愛鳥聲幽不辭般若遊頻尋樵子徑轉向碧峰頭雲鎖僧房靜門荒衰草稠所思曾不見空對古松楸

遊白雲山

黃江起 邑人

山泉遠落白雲塢細石疏林夾溪路追尋泉脈到峯頭

南陵縣志

卷四十二 藝文

五十

峯頭白雲共來去豹兒嶺上啣夕暉獅子岡邊空翠微

一抹霞連荻江水千巖鴻逐秋雨飛我欲因之乘雲上

白鶴仙人歸不歸

靈山古龍井

詹天挺 宣城

一泓深莫測古磬綠苔封霖雨三農望時來起蟄龍

靈山謝巖

詹天挺

謝公著屐後誰復繼幽尋偶就巖前酌藤花落滿林

南陵道中

汪友亮 婺源太僕

辛苦南陵道年年作客情遠山酣霽色空樹飽秋聲酒好聊尋醉詩多不記名祇應雙屐屐知我太勞生

督學朱公垂問著述奉答

劉握邑人

東壁下轡車西河訪瑟居乍聞私踊躍欲對轉踟躇婉
變年方晬連延痘滿臚三醫嚙扁鵲兩曜蝕蟾蜍戚戚
嘸昏夜俚俚嘯魍魎是人嫌眇馬老父獨憐余左傳師
尼父張詩友仲初不須愁味谷惟遣事經畬闕澤備相
代王平聽蔑虛淵源常浸灌椎魯漸開除黑白昭昭辨
英華旦旦咀祕辛歸橐籥雜酉恣畋漁敢學逢時技私
慙汲古疏鍊光開赤堊磨玷費青儲剛喜書唧鶴俄悲
索蠹魚圃荆遭破析莊墨遂齟齬兒子巢鳩拙田園種
蛤淤莫糊共叔口能倩杜陵胥寄目蝦沈海開編蚬落
南陵縣志 卷四十二 藝文 五十二

待月山

劉握

歸鳥沒遙岑幽人長獨往路暝莫愁歸坐遲明月上

過太白酒坊

劉煒邑人

不是高陽市青蓮舊有坊仙蹤羈倏忽亘古望蒼茫鳥
弄歌聲緩花留酒興長千年明月在猶似見飛觴

西溪步入蕭家齋

戴元升邑人

策蹇城西路溪光未易描紫嵐飛遠瀑魚浦鎖平橋新
漲朝來雨晴添夜半潮賣花聲最豔居人稱勝地識春
饒

歸自峨嶺有寄

劉幹邑人

萍蹤纔一月柳色已三春茆店狂呼酒輕涼倦臥茵閒
遊尋地主得句憶詩賓寄語南山好相逢即近鄰

鵲江懷古

何紹源邑人

江頭草樹綠參差鵲岸曾經百萬師擊柝赭圻完內繕
飛艫貴口策前塵磯嶼乍訝霜戈列浪激猶疑畫角吹

南陵縣志 卷四十二 藝文 五十二

四海於今烽燄靜瑞雲千里望無涯

遊千堆山

張曾敏教諭

追尋勝跡呂南來乘興還登九浦臺片月如冰寒萬壑
輕雲似絮散千堆老松蕭瑟栖閒鶴野岸枳枒綴古梅
惟有騷人招手過奚囊拾得好詩回

題輞村讀書圖

張曾敏

呂嵐高出碧雲端如畫溪山面面看愛有幽人結茅屋
讀書午夜不知寒

將之宿州留別南陵

張開士知縣

六年倥傯去桐鄉春穀三秋別緒長江北江南同過客

好山好水繫吟腸殷勤祖饒勞諸子事業留遺愧彼蒼
回首漳淮芹藻綠遙知秀發在宮牆

送陶熙文大尹歸南陵

楊大鵬

懷中

幾載長安踏軟塵曾從車馬識芳鄰閒依琴鶴心如水
靜挹芝蘭氣有春五柳光風懷好友四知清夜對前人
黃花莫負秋容淡詩就還教酒入脣

南陵口號

三首

許懋堇

海甯

潭水拖藍南陵一景清弋江清工山削翠
南陵一景敬亭平

子明自昔稱仙令漢寶子明為南陵宰杯渡浮杯破浪

行梁高僧無名嘗浮杯渡江於此

南陵縣志

卷四十二

藝文

五十三

朗陵侯廟工山旁晉朗陵侯何琦去謫仙子祠新酒坊

山下有新酒坊建太白祠游人指點鵝公凸鵝公凸即著帽之餘下

磚雨舊事猶傳石碌場唐廢繁昌縣為石碌場按石

香由寺內晚鐘鳴玉帶橋前新月生最愛人家多面水

凭闌時聽權歌聲

曉過南陵東邑宰陳雪邨

增

謝登雋

祁門

朗陵城西夜雨足溪聲夾路鳴哀玉山煙一縷曙雞鳴
初日寒郊潑濃綠連畦高下邨徑紆豐年樂事無一無
兒童抱書赴冬學翁媪賣漿開地墟催租投牒跡如掃
百里皆甘菜根飽長官舊是灌園翁露甲煙苗書上考

雪邨為宣州參軍時應事前悉種菜

青弋道中

增

沈善貞

宣城

野渡接平沙籃輿一徑斜村墟繁竹塢渚寺冒藤花半
菽嗟農事虛舟翫物華故人今把臂清夢穩蒼葭

留別邑紳士

二首

陳梅

知縣

銅章疊縮愧予迂春穀還經兩載逾三異未能臻雅化
四知徒自凜冰壺支牀寒怯風侵榻伏枕愁深月在梧
幾度踟躕難報稱敢云臥理做名儒

百里琴聲暫輟彈許多心事未能安緇衣昔詠追蹤切
美錦今知學製難豈有郇膏流赤子何期棠愛及微官

南陵縣志

卷四十二

藝文

五十四

臨岐駐馬頻回首極目雲山曉露溥

泮井

王中孚

邑人

文廟引河流為泮池當巽位有泉穴乾隆乙未
旱河涸循泉脈而浚之其水清冷甘潔日可供
數萬人飲戊戌復大旱居民賴之師臺顧感其
沒於泥沙今實有濟題曰泮井以紀其事

吾陵有古井泮池涵清影託地非不靈下隱泥沙冷神
斧長綆添養民叶泰占通塞關世運地德甯獨廉僉識
天泉孕香滿甘而淨忠信自有常真可蘇民命劇愛廣
文師感慨繫以詩詩成井不朽坤維顯奇施瓊漿挹取

走銀漢燭南斗用舍各因時豈曰遁藏久吁嗟冽寒開
否極應泰來井渫用之兆允矣升瀛臺

題南陵李貞女傳後

汪 燾 歙縣

鬱鬱孤生桐引蔓延兔絲盈盈李氏女許字葉家兒兒
女各十歲恩義何由知十一學刺繡十二學畫眉畫眉
雖不長深閨人見稀豈知賦命薄十三葉兒萎洗我眉
間黛脫我繡羅衣寸心已先死徒存骨與肌阿母勸加
餐所食惟藿薇耶嫂致衣履所服惟紵絺舅父問甥女
年少何苦爲貞女拜舅父涕泣前致詞婚姻一以訂髡
髦爲我儀豈不念父母九泉誓相隨死葉不死李大義

南陵縣志

卷四十二 藝文

五十五

當來歸歸時年十八六載星霜移入門謁姑舅易衰拜
耶坻女節亦已盡女病忽已危恨銷地下從合厝方山
陞上栖比翼鳥下結連理枝鄰里重歎息行人爲歔歔
黃鵠誓相守孔雀東南飛從一固當死未從何所依卓
哉李貞女隻手提天維採茶刺傷手食梅酸沁脾梅酸
而茶苦孰知女心悲

夜過南陵道中有懷謝希齋廣文

增 許全治 歙縣

午夜南陵道霜飛月正中馬蹄驚樹影牆角轉山風已
近故人宅翻嫌去路匆十年魂夢裏今復感秋蓬

雷雨行南陵道中

增 方士琯 歙縣

天氣凝寒候聞雷瑞也無溪喧山水漲林動野風呼泥
路滑如膩棉衣濕到膚煙濃茅屋暖安坐羨田夫

南陵道中

增 鮑桂星 歙縣

一畦相間一陂塘圓璧方珪互短長不信秋來天不雨
蕎花雪白豆花黃

青天捲映暮霞紅霞外煙巒翠靄籠燈出江南秋一幅
不知身在畫圖中

冬日自南陵至新嶺道中卽事

增 趙吉士 休甯

黯黯煙波接大荒短蓑牛背笛聲長隔林溪響千山雨
近墅梅開十里霜何處高原封馬鬣幾人岐路泣羊腸

南陵縣志

卷四十二 藝文

五十六

行逢故友迎譙郡爲道當年舊酒狂

發南陵

增 陳 萇 吳江

一路寒泉送客程離亭回首隔山城秋從黃葉聲中老
人向青山缺處行幾片閒雲供畫本一林落日待詩成
來時記得留題處尙有殘尊慰客情

南陵早發

增 張思教 歙縣

野店雖投宿嘈嘈夜不安未明先起視坐久勉加餐霽
月當前照晨星背後看山河煙霧露曙色動秋寒

甲寅十一月自皖歸南陵途中遇雪口占

增

左 輔 知縣

正是江梅報臘初曉風吹雪滿肩輿緇塵喜爲征裘浣
山色知緣俗吏疎萬井耕桑懷蔀屋兩湖煙樹憶蒿廬
蒿廬在葛嶺下先府君墓前饗堂且教贏得豐年兆袖拂瓊華樂有餘

渡青弋江

增

黃景仁

武進

羣山如結髻青青度陵陽山中水界途一葦茲用航錦
石燦沙屑晴州鬱蘭芳甫聆棹謳響勞躅渺已忘馬目
眩水色客鬢愁波光人馬一時渡去路如川長

南陵道中

增

黃景仁

又作輕裝發驚心逝者川殘春辭馬首舊路落愁邊縣
古飛花裏程遙去鳥前還看道旁柳手植已吹棉

南陵縣志

卷四十二

藝文

五十七

春穀道中

增

黃景仁

朔風吹客度長林浩蕩川原雪氣陰一澗紅花名寒澗
冽雙峯隱玉晚蕭森人因瘠地多飢色鳥爲空天有去
心日暮那堪途更遠馬嘶猶似助悲吟

南陵道中

增

洪亮吉

陽湖

卅里南陵路盤輿古道閒怒雲生怪樹濃綠闌層山麥
氣松杉入禪心鳥雀嫺還因去程急未及訪玄關

曉發清弋江

增

鄭尙嶽

歙縣

雲水蒼茫裏扁舟一葉過半江沈月影雙槳打煙波殘
夢隨流遠離愁傍曉多推篷望風色今日定如何

歸里過清弋江晚泊

增

朱紱

歙縣

十尺蒲帆山裏行斷崖薄暮晚煙生漁舸歷歷收絲細
鳥陣翛翛歸羽輕月照半船行旅夢人喧兩岸異鄉聲
太平夜靜無防駐戍鼓雖敲已撤兵

南陵道中

增

吳光璧

貴池

山到南陵骨更強連朝細雨鬱蒼茫雲生壁上青天窄
江走林端白練長曉露濕衣秋草碧晚風吹鬢稻花香
筍輿鎮日渾忘倦不信人間有亢陽

晚泊清弋江

增

胡承珙

進江

疎林繫纜欲黃昏暮雨瀟瀟江上村鴻爪又添新雪印

南陵縣志

卷四十二

藝文

五十八

蜂窠難認舊篙痕安心有法憑書卷學道無功累夢魂
贏得峭寒禁永夜竹爐灰細火猶溫

晚抵弋江

增

吳學洙

涇縣

山近行廊晚翠滋眼中村落漸參差年荒野店關門早
水淺孤舟上瀨遲楓岸鴉歸秋色裏柴門犬吠夕陽時
板橋楊柳今何在過客猶吟杜牧詩

南陵道中

增

周庠

東臺

白雲方出山復被山圍住須臾化作煙彌漫失前路僧
從何處來滿身染蒼素遙聞流水聲知有一重渡

弋江晚泊

增

朱琯

涇縣

木葉下江臯西風勢尙豪蒼然來暮色此景倍蕭騷凍
雀依人慳閒鷗笑我勞岑廬山午午轉讓赤灘高

擬工山會迎送神詞

增

劉開兆

邑人

迎神詞

日在柳兮大暑絳翠蓋兮赫叩叩望工山兮神靈雨維
吾民神之主肝蠻通神福汝緼瑟兮吹竽傳芭兮擊鼓
迦炎宋兮錫珪珎藩吾陵兮食此土祝豐年兮多稷黍
侯不來兮吾氓苦

送神詞

樂神兮巫覡謳風洽洽兮倏蓐收山之西兮雲浮澗之

南陵縣志

卷四十二

藝文

五十九

水兮東流朔日兮不諏薦芳芷羅庶羞牲脰旨酒柔
遵秋浦兮神不留駕朱幡兮振回輈答嘉貺兮滿車籌
金天淨兮乃亦有秋

青弋江權歌

增

劉開兆

漁浦人家灣復灣輞川繪出景幽閒周遭碧樹一溪水
披豁晴窗四面山

杜牧風流步履遙柳絲婀娜小蠻腰而今憔悴江潭上
不見青青柳拂橋

丹楓落照餘千點白鳥銜魚起一雙呼得玉潭居士出
試將橫幅寫秋江

一水迢迢自有源不須西去問梅根

梅根治亦時平故

壘餘荒草重帛空江廣武屯

晉書錢鳳作逆加官城內史鍾雅廣武將軍屯青

江拒

清江滑笏水如油只少麻姑一髻浮若使夸娥能解事
移來臨水學梳頭

水色瀟瀟風色秋鷗鷺鷥子漾中流緯蕭河上人多少
可得驪珠一顆收

南界山鄉北水鄉中間無數好陂塘如何泯泯江流下
獨讓漳陵作曲防

寒到渠儂少徹柳煙篷七尺葦中居昨朝射虎銅官下
南陵縣志

卷四十二

藝文

六十

又向東溪學釣魚

不論儉歲與豐年射的先拈一筵簞

居人以射的山色占歲

辛苦

穰禾租稅了吳儂倚權得安眠

小喬墓

張鴻翥

池陽

舊傳墓在香由寺前乾隆己亥高前令徵夢於

古梅下表其墓嘉慶辛酉余從兒來營署偕武

陵沈君拂山輩訪古跡留題

第一山傍問墓臺埽開蒿徑拂塵灰古梅猶繪天香豔

新月長留地主哀嬌倚英雄橫寶劍愁澆濁酒翦荒萊

三生石畔傳藏玉阿姊分明共去來

青弋江增

陸錫熊上海御史

前行阻一溪溪水何渙渙云是青弋江極目因眺翫
雲擁樹崩奔水侵岸危枝棲野鵲頽壁叫沙鷗收明
女獨沆風定漁相喚棟宇似鴈行舸艦如魚貫煙迷近
巘平霧捲高峯亂嵐光挾水氣欲浸遙天爛覽景因澄
懷九垓期汗漫既乘上皇心復契丹砂散願隨王子喬
接引上霄漢

南陵閒眺增

李兆洛江陰

嘉慶甲戌正月登九華還將赴姑孰道南陵陳
明府雲樞留我信宿遂同白舫芸暉星槎訪小

南陵縣志

卷四十二 藝文

六十一

喬墓復登城而眺宿雨初過麥隴交翠原隰迤
邐旁多長林煙靄中望江上諸山平遠無際俯
視臨溪茅舍側老梅數株方盛花循闌而西至
北樓顧郭中粉垣周遭萬瓦稠疊遙簷之際蒸
霞一片爛如桃花遙玩太息恨不得至其下折
而南至東城隅傍園有廢園云昔劉氏墓園也
坡陲下由頽垣缺處入池臺之址曲折有跡而
院宇鞠草惟古柏一株蒼蔚特異旁一梅大可
合抱高數丈尚蓓蕾未破憩池邊石上久之乃
出石路苦滑轉而北卽墓園之西復西行見短

垣中棕櫚數十樹亭亭挺秀一垂柳纓帶之庭

中紅梅方花卽城上所望之蒸霞一片也循垣
索門一扉顏曰南圃扣之有童子啟關則相與
徑入花圃菜畦錯落蔓莠海棠辛夷牡丹芍藥
之屬無不有環坐梅樹下湖石數枚玲瓏伏草
間盆盎雜蒔菖蒲松竹頗足野趣少頃主人出
啜茗焉知爲廣文姚君某第也廣文有是園而
拂石看花乃屬吾輩劉氏園則求主人而不可
得而吾輩今日之遊又非有前期看花之約者
也芸暉曰是不可以不詠故予爲敘之

南陵縣志

卷四十二 藝文

六十二

故園別去幾經年日日思歸枉白牽柳已搓黃波已綠
雲山東望一淒然

勝題猶記曲江公軒檻空餘想像中剩有百年喬木在
可能管領舊春風

皮癢條剝苦槎枒鐵骨憑將閱歲華底事欲開偏緩緩
自嫌身是路旁花

只爲尋花不自疑便穿苔徑倚花枝何如坡老黃州日
拄杖敲門看竹時

小喬墓增

李兆洛

尋常草木借餘香故壘東邊墓未荒多少才人嫁斷養

古來能得幾周郎

梅花一樹傍幽姿尚有詞人寄夢思銅雀傾來歌舞歇
左驥齋姐阿誰知

甲子九日同友遊春穀尋小喬墓偶憩第一山刹

宋九勳

雲連雉堞勢崑崙春穀秋光點點搖煙火萬家攢塔脚
溪流三面繞城腰晴空看雁心同遠古徑尋花興轉饒
倚劍臺邊回首望幾多英氣拂星軺

東吳往迹久蕭條猶向秋風弔小喬老樹斜陽餘影亂
美人香草總魂銷鍾情過客爭澆酒好事賢侯禁採樵

南陵縣志

卷四十二 藝文

六十三

林畔乍聞清磬響攜尊一笑虎溪招

惠民橋晚泛

增

王成璐

知縣

沿城通淺溜一棹下雲根笑接東山友波翻北海鱗紅
橋交曲港綠樹隱荒村點綴殘霞外新詩落筆痕

偕劉日堅董柳塘吳石似香由寺夜集

增

王成璐

挈手偕嵇阮相將遠曲濱秋山寒露骨夜月靜窺人醉
態狂誰減詩情瘦逼眞蒲圃如可借暫憩臥雲身

宿何家灣

增

王成璐

樹影掛斜暉前村駐翠微天空孤月皎嶺複亂雲飛白

杵占豐稔盤餐拜德威雞鳴催策馬野老尚依依

攜酒集劉園雙松閣

增

王成璐

飛閣綠雲起雙松古綴聳荒雲眠石榻野鳥入湘簾花
月清樽滿風霜短鬢添故園三徑在底事道途淹

捐修名宦鄉賢二祠

增

王成璐

屋漏原無愧蒼天鑒視中宮牆隨左右
架西東俎豆衣冠地詩書禮樂風流傳千萬古文獻拜
諸公

塔頂柏

邑賢宮側有塔上生柏樹大可
合圍占幹輪囷真奇觀也

王成璐

南陵縣志

卷四十二 藝文

六十四

一塔衝霄出龍枝百尺盤子從天上落葉向霧中搏拔
地餐風雨凌空舞鳳鸞吳剛如借斧伐取蒸沈檀

晚步千佛寺

增

王成璐

信步遊春穀琳宮枕夕曛禿餘千古樹堆破一樓雲佛
座香燈暗僧家禮數勤聯吟歸路晚鈴語趁風聞

香由寺

增

王成璐

古木與山齊香由廢寺西梵音僧飯過雲氣石樓低寸
土埋春艷寺側有殘碑覓舊題夕陽風掠處一陣亂鴉啼

大工山

增

王成璐

保障環春穀綿延一道長山深晴作雨水近暖生涼大
孝乾坤著有晉何孝子廟高吟草木香仙茶和露煮道是養生

方

朗陵雜詠增

王成璐

草偃慶風行熙皞太古情鄉鄰皆重義婦女不輕生水

壩連雲築

東北皆圩田

山田帶月耕

多西山

遺金誰肯拾穩睡

短長更

小邑屯龍虎周郎舊領軍

周郎曾為邑長

泉淘仙客酒

太白酒坊香

透美人墳

小喬墓

大孝山中著

晉何孝子住工山

奇枝塔頂芬塔頂

柏有老

纂修完邑志

前令劉石臣修志

萬古有香聞

南陵縣志

卷四十二

藝文

六十五

版籍分都甲

六都各分某都某圖

煙村十萬家九區通驛馬一縣

界蓮花

城內有七蓮花塘

艇小飛鵝

名曰鵝行小船

堤長錯犬

牙

圩田最多

雙標懸四野

各建祠宇

集昏鴉

草卉衣冠古人家竹石安屬壇塗鬼面

祭厲時羣塗鬼面以賽佳

節獻歡團

每節以米作丸分食名歡團

傀儡逢場戲

偶每劇演木魚蔬便

客餐遙遙城市路到老不知官

食儉無多品家家釀酒泉

各釀酒

香莖收水國

產水草甚香脆名水

泥豆摘星躔

產大豆子

切玉貪青笋

出春笋

炊珠啖白

蓮

出白蓮子

羔羊充市脯

羊肆售

到處列腥羶

寄吳鞠裳南陵

增

何紹基

道州編修

人言衝劇宜遷官我謂好官先樸閑羨君別我忽萬里

一鳥紗外是青山青山修修濯春雨霄霧蠻煙皆媚嫵

朝寫百幅供色養莫詠千篇當治譜山中童子初受經

求公醉帖來公庭愛公讀書好風調有子學賦歌雲屏

誰家老農涉官事失卻耕牛煩處置攪公一夜眠不得

比似苦吟爭半字

過圓通菴

增

汪照邑人

歸路茅家嘴鐘聲聽隔河寺荒修竹遶水浸夕陽多一

角紅牆露三篙碧浪拖訪僧舟北渡何處覓元龜

過奎湖拜盛此公墓題絕句

增

吳芳培

涇縣編修

南陵縣志

卷四十二

藝文

六十六

采石曾經太白墳異人題柱有鴻文先生醉臥何嘗死

此語移來持贈君

男兒或似可憐蟲阿母何因況味同卅載課兒心血盡

慈幃辛苦倍丸熊

詩人曙後一星孤飛絮吟成弱柳枯化鶴飛鳴依乃父

孤山呼子有林逋

班班春雨綠萼柔渺渺荒魂鬼亦嘯想見中郎絃下淚

至今湖水咽寒流

步兵白眼猶多事痴絕何妨木石頑始識先生非瞽目

懶開眸子看塵寰

桃花紅錦鬪繽紛遺恨多於壠上雲萬古荒丘只埋骨
不埋詩稿不埋文

碑文六字當離騷月湧驚湍風怒號莫道豐碑榮處士
平生筆塚比墳高

暮雨寒亭野竹芳此公高節此君長布衣自古傳名少
端爲南豐買瓣香

之任臨湖留別春穀士民

增

賴同宴

知縣

半載匏羈暫息肩愧無德化媿前賢漫云馴雉依桑驗
却笑流鶯入谷遷風逐馬蹄增別恨雪留鴻爪話前緣
臨歧何事生惆悵文廟賓興兩念牽

文廟賓興兩事甫有成議余適卸篆

南陵縣志

卷四十二

藝文

六十七

贈別賴劍平明府用留別原韻

增

陶寶森

邑人

百里巖疆重荷肩芳聲早播使君賢琴彈漳水音猶在
錦製臨湖道不遷從古循良非異政祇憑慈愛洽羣緣
春風楊柳江城路情共驪歌一縷牽

又

增

劉樹棠

邑人

德化陵民忽卸肩多情父老道官賢六鄉草偃風初美
滿縣花開迹又遷錦製臨湖他日政轅攀春穀後時緣
廉捐鶴俸振文教此去應知寸念牽

又

增

劉弗增

邑人

教養兼施任一肩家傳治譜仰高賢牛刀小試徵歌詠

鶚薦頻膺慶擢遷境訪桑麻臻雅化案留翰墨續良緣
葵心從此傾心切嶺望芙蓉別緒牽

南陵道中贈邑侯宗文宿刺史

增

王詠霓

黃巖知府

一鞭遙指大荆山千佛摩厓庵霽間不管歐陽湖水綠
自臨石碓照煙鬟

扁舟夕泝小淮河黃墓渡頭載月過寄語朗陵賢令尹
離情誰似石溪多

酒坊懷李白

增

宗能徵

知縣

酒家誰自盛唐傳底事難忘李謫仙古刹空遺明月影
豪情猶憶醉吟篇天教詩境深於海地爲才名流故塵

南陵縣志

卷四十二

藝文

六十八

到此幾經悲過客金樽傾處已無邊

留別春穀士民

井序

增

葉資深

訓導

慨自義輪易轉夸枝難追荏苒兮未秩久羈恨
涓埃之未答迢遞兮輾塵再踏訝況瘁之何爲
境以袁閔却離土室才非樂毅直上燕台未免
遲暮興嗟蹉跎莫補矣然而不容躁者情也不
可拘者遇也蟲俟秋而始鳴別饒逸趣梅經冬
而纔放轉溢清芬矧夫鹿洞規模近成陳迹鱣
堂況味冷過孤僧匪緣木而求魚奚守株以待
免此所以仰希列士甘作勞人者也惟是良朋

久聚別最銷魂多士從遊去難分手門外之驢

歌待唱雪中之鴻爪宜留用賡七律四章續遊

子河梁之句所冀一唱百和聆大雅金玉之音

陵陽溷迹一星周忽向京華汗漫遊宦海茫茫思插足

瀛洲渺渺怕回頭會試屢未售科舉停悵悵而已補天難覓媧皇石集

腋將更季子裘自笑暮年心尙壯竟忘兩鬢髮凋颯

冷署棲遲養性天問誰催我赴離筵寅僚韻似璵璠叶

紳士交逾鐵石堅穠李成陰猶盼雨舊日諸生時來請業藍田種

玉況生煙學堂所造之士分送南京各學堂已數十人只緣截取今符例

聊向長途一著鞭

南陵縣志 卷四十二 藝文

六十九

頭銜奉祀舊稱更株守何妨過此生世局新翻縈夢寐

君門遙睇繫心情寄身有子依鸞掖繞膝攜孫入鳳城

大兄以縣丞供職京師擬將家總長孫帶往敢謂斯行能遂志一囊書劍去

來輕

此出如能假斧柯酬知志願定如何逢人氣靜招尤少

遇事心平造福多淡泊甘盟清獻鶴艱難須厲魯陽戈

與君約略談衷曲可有閑情爲訂譌

南陵縣水災新樂府 并序 增 程用傑 知縣

用傑待罪南陵兩年矣政不能理民不能和天

降之災連遭水患心勞日拙竟撫字之無方痞

口曉音終呼號而寡效誠以發棠之請乞米之

書紛至而沓來習見者束閣也用傑職司芻牧

目觀流亡痛哭陳詞長言不足爰仿香山新樂

府體作南陵水災新樂府十三章雖藻采聲情

遠愧長慶而於所謂詞質而經事覈而實者亦

庶幾彷彿焉惟望豈弟君子惻隱爲懷鑒告哀

之忱爲將伯之助宏千鈞毅力造七級之浮屠

拯九死遺黎延生機於一線則用傑幸甚災民

幸甚感且不朽

連年荒

南陵縣志 卷四十二 藝文

七十

連年荒田廬蕪沒人流亡野無青草室懸磬酸言苦狀

難俱詳撮所見聞舉一二已令聽者悽肝腸吁嗟乎人

生不合居耳鄉水災酷甚旱與蝗衣敝屋頽水未涸霜

棲露宿家無糧大戶賣田舍中戶當衣裳小戶無可賣

鬻女質兒走四方一之爲甚豈可再天何不弔連年荒

嗚呼民何不幸生耳鄉

築堦口

築堦口滿面飢容春在手不築堦口明年饑欲築堦口

今日餓且疲終竟疲生勝飢死邪許一聲心力齊官督

催紳勸導好自爲之恩帑到國帑雖少堦雖多須知涓

滴皆恩波仁苦停辛且努力不然明年水至將奈何就
中容有飢情者尅日督工難稍假官言再情且加刑手
執蒲鞭淚暗灑破涕爲笑笑相勸勤則不匱邀天眷還
汝明年飽喫飯

圩隄潰

圩隄潰去歲程功今枉費突如來如神哉沛風雨如磐
無處避不知何處墻屋傾不知何處簣椿碎惟聞呼聲
哭聲流水聲如雷如潮如鼎沸官紳面相覷老弱泣相
對縣官無何相撫慰施以糜粥旦夕延予以編蘆風雨
蔽汝曹且無啼行行水將退晚禾行且添嘉穗嗚呼遂

南陵縣志

卷四十二 藝文

七十一

使吾民重負累

補插苦

補插苦補插苦錢一千秧畝許明知挖肉痛愈深可憐
舍此瘡安補農夫耕且言且言且頂祝不願天雨珠不
願天雨玉但願天晴苗長速無雨無風過三伏吾儕渴
死死亦足婦子饑且言一言一淚垂中田稻一穗全家
命一絲願天惜微命無使風雨摧但看復水重來日卽
是全家命絕時我聞仰天重歎息天乎遠作蒼蒼色雖
然天意未可知或者民之所欲天從之

復水來

復水來七十二圩一旦築復開三十一圖無乾埃晚禾
千頃水底沒飛鴻四野鳴聲哀栽復稞築埃口躑躅臨
流一回首白浪滔滔空所有椿簣費晚秧錢稱貸而益
今徒然大江東去何時還君不見去年災今未復今年
災乃加酷瓶無粟體無服水居無舟陸無屋空乏其身
朽其腹相對吞聲不能哭噫吁嘻悲哉復水來復水來
一年災抵三年災

羅掘空

羅掘空田間惟白水雀鼠俱無蹤竭澤而漁聊覓日萍
藻和羹充口食萍藻有限來日長何以卒歲徒悽惶不

南陵縣志

卷四十二 藝文

七十二

惟蟹稻少遺種且無菜麥愁春荒來歲春荒猶後圖眼
前切近災剝膚君不見風號雪虐歲已徂扶老攜幼爲
飢驅面目黧黑形容枯三五縮瑟泣路隅日暮途遠聲
嗚嗚涸轍鮒兮繞樹烏悲哉吾民猶弗如請君視此流
民圖

流民圖

流民圖不忍繪未罄形容先下淚圖唯寫貌難寫心不
如宛轉以詩代我詩才薄俗且平好將平俗達民情滿
腔憔悴憂傷意滿紙流離嗚咽聲憔悴流離詩一紙創
鉅痛奚啻過比戕無獨女女牛羊友忍立而視其死殘

義倉捐薄俸蚊負蟻駝徒自惆演爲樂府詩代表民間
痛冀動仁人君子心登高而呼應者衆流民圖爲君誦

嗟來食

嗟來食乞人所不屑嗟來食饑民爭哺噉豈惟爭哺噉
嗟來之食且不可多得君不見昔之沃壤今沙泥昔之
素封今流棲中人之產逐波去立錐無地顏色低又不
見哀此焚獨萬千百斑白負戴襁抱挈天寒日暮炊煙
絕蕭條墟市簫聲咽疾痛慘怛不可說詩成莫辨淚與
血

溺女悲

溺女悲述者淚墮如縷縷云有圩鄉婦氏某夫本耕讀
家中貲連歲災荒田產盡一貧如洗身子遺夫也病羸
息僅屬婦時生女呱呱啼病者在牀嬰在抱三日無米
難爲炊婦乃忍飢抱女出雪涕投界河之湄我躬不閱
況我後不能鞠養生何爲汝命如泡逐水散爺娘不久
相追隨鮮民之生不如死昔聞其語今見之我爲民牧
職撫字賦此哽塞難成辭

來日難

來日難來日難工振平糶難周全挹彼注茲法原善並
顧兼籌終弗徧患貧患寡患不均杯水車薪爲三歎區

別災情重與輕勉分次第便施行急所先務定民志聊
勝於無慰衆情調查未必無遺漏就使無遺可能救飢
民數萬款數千計口計日心惓然

請禁米

請禁米酌劑盈虛非得已南陵禁米自昔始今之視昔
非昔比昔閩之市從風靡今之禁也良有以年荒米貴
價倍徙涎眼蕪湖市場美大賈連橋連不止聽客所爲
伊胡底請禁聊以固吾圉吾儕庶緩須臾死苟自救也
斯已耳百姓不足君孰與持之有故言成理保民足食
民信矣此義諒爲官所許過羅明知非政體抑豈肥人

先瘠已省界流通問有幾縣界安能無彼此官曰來前
吾與語官無善政災難弭連遭奇荒吾累汝悲從中來
賴有泚遇於一哀而出涕民也號咷淚如雨稍稍引去
官乃起約法三章民安堵無擾無譁無流徙南山可移
禁莫弛君不見米禁雖未弛小戶已無米家無僮石甕
莫舉又不見圩民日月呼庚癸三旬九食雜糠粃命之
不絕者如縷

求官振

求官振官仰屋助冬工補不足求官振官借米急振來
半價抵求官振官困難皖北陡傳遭水患餓殍者萬家

漂沒十餘縣皖南災狹皖北寬官振重北遂輕南振及
皖南成弩末餘力不能魯縞穿皖北災廣宜加惠皖南
災數南陵最災區廣狹縱有殊災民困苦原無二豈有
咨寒怨暑心敢援稱物平施義但增一勺卽西江來蘇
漑我枯魚肆縣官詔災民汝輩無紛紛汝不見中丞拊
汝驄馬巡又不見拯汝特簡兩大臣三公持節宣皇仁
汲黯便宜伊尹任公布大惠惠必均豈獨遺我南陵民
行將登汝春臺春

募義賑

募義賑淚下數行首九頓能施一粟惠一絲永戴仁心

南陵縣志

卷四十二 藝文

七十五

廣仁聞災民忍死待賑來萬頸齊延萬口開天寒歲暮
餓且僵君不見溝中之瘠道旁殮明知濟衆事原難周
急何來續命田垂涕爲民重請命我有一言幸垂聽貴
人少製一件衣災民十戶免啼飢富家少吃一席酒能
活飢民數十口吁嗟乎吾儕飽暖酣嬉須臾耳請君試
想窮檐裏臥冰嚼雪嚼草根此際不知幾人死損君僕
賃一日費生死肉骨感君惠願君集腋能成裘五夜焚
香禱祀求心誠求之如禱祀長歌當哭詩言志不盡悲
風怨雨吟維祈甘露慈雲被仁粟卽慈雲義漿卽甘露
叩弗復衆主等互可少敗齊人敗等互可少萬家生佛

供香花海屋籌添與沙等祝君福壽同無涯

詞

點絳脣

南陵道中

增

趙錫璜

合肥

落葉蕭蕭馬蹏雜沓陵陽驛盾磨矛折有客新投筆
仗劍從戎不怕關山隔烽煙逼幾聲筆策攬入離亭笛

南陵縣志

卷四十二 藝文

七十六

南陵縣志卷四十二終